

AWAJUN CHICHABAI JIIKBAU

**GOBIERNO TERRITORIAL AUTONOMO
AWAJUN
GTAA**

BATSAMSA TAKASTIN CHICHAM UMIKBAU

ORDENANZA TERRITORIAL N° 12-2024-GTAA-I



Primera Edición

INDICE

EMTIKSA AGAGBAU

NAGKAMATTAKU JINTIAMU	5
TITULO I	6
AENTSU AYAMKE	6
CAPITULO I	6
AENTS IWAKU	6
CAPITULO II	8
AENTSJAI BETEK AIDAU NAJANKAMU	8
SUBCAPITULO I	8
IJUNTUJA TAKATAI	8
SUBCAPITULO II	9
TAKAT KANAJKAMU	9
TITULO II	10
NUGKA, TESAKBAU AIDAUSHKAM CHICHAM NAJATUAMU	10
CAPITULO I	10
AWAJUN NUGKA	10
CAPITULO II	10
AWAJUNI BATSATKAMUJI	10
CAPITULO III	21
KISTIAN AENTS BATSATKAMU	21
CAPITULO IV	23
NUGKA UJUIGKAJI	23
CAPITULO V	30
NUGKA AKANJA TAKAT	30
TITULO III	32
IINU ASAMTAI UYUMAT ANEAKAS TAKASTIN	32
CAPITULO I	33
IINU	33
CAPITULO II	34
UYUMAT ANEAKAS TAKAMU	34
TITULO IV	35
BATSATKAMUNUM PUJUT	35

CAPITULO I	35
BATSATKAMUNUM PUJUTAK JUJUWAI.....	35
CAPITULO II	38
BATSAMSATNANU IWAGBAU	38
CAPITULO III	39
AJA TAKAT	39
CAPITULO IV.....	40
JEENTIN AMAIN	40
TITULO V	40
PATA WEGAMU	40
CAPITULO I	40
NEMAJDAIYAMU	40
CAPITULO II	46
UCHIJUI.....	46
TITULO VI.....	50
NUWIYA AENTS AIDAU PUJUTI.....	50
CAPITULO I	50
DEKASKEAPI TUMAIN NUNIAKU IWAINAMU.....	50
TITULO VII.....	51
BATSATKAMUNUM PUJUSA UYUMAMAIN.....	51
CAPITULO I	51
UYUMASA WAJI SUDAITAI AMAIN	51
CAPITULO II	54
UMIKTATJAI TAKU DUTIKATIN.....	54
CAPITULO III	55
TSAGKATDAIKAMU UYUMAKA BETEK AKINIAMU	55
CAPITULO IV	56
AKIKMAKTIN MAMIKIAMU BETEK UMIAMU	56
CAPITULO V	57
UYUMAKA AWAKTUNIAMU.....	57
CAPITULO VI.....	58
UYUMATKA AWAGKI APUGTAMU	58
CAPITULO VII.....	59
PUYATJUKA AWAGKEAMU.....	59

CAPITULO VIII.....	60
UTUCHATNUMKESH, EMESJAMUNMAKESH AKINIAMU	60
CAPITULO IX.....	61
MUUNTI UYUMAKA DUTIKMAIN.....	61
TITULO VIII.....	62
IJUNJA BATSAMSA DUTIKATIN	62
CAPITULO I	62
INANIT	62
CAPITULO II	63
AKIKMATKATIN.....	63
CAPITULO III	63
ANENTAG SUWAMU.....	63
CAPITULO IV	64
TSAGKÚJA TUKE SUWAMU.....	64
CAPITULO V	65
TSAGKATDAIKA AKINIAMU.....	65

NAGKAMATTAKU JINTIAMU

Art. I.- Tsawanji

Chicham umikbau juju papiinum agagmawa juka, yapagtai atatui jujai betek tikich chicham umiktin najanku.

Art. II.- Nagkaemakiunuchu

Anentai jintiaja chicham umika agagmawa juka wajuti juju agagbau jiinkittawa duwi nagkamas umiamu atatui. Jujú papii jiinsaig yaunchuk waji nagkaemakiunak chichamjatsui, untsu constitución Polítikanum dutikmainai takuig duka betek takamainai.

Art. III.- Dutikamua nú esakatbau

Takat shiig ematsuk tunamamain diijaukesh dutikamu aina duka, nuniachkush shiig batsamta nuna pachima duka, anuig wajantí tusa idaitai atatui.

Art. IV.- Tikich chicham umikbaujai apatka takamain

Batsatkamunmaya aidau umikagtin chicham umikmawa juwi ashi pachisa agagchamuk tikich chicham umiktin agakbau aina nunú diisa epegtai atinai.

Art. V.- Batsatkamunmaya Jintiinji

Juju nugkanum batsamsa antugdaisa takastin chicham uminka nunak, Jintiin atinme tusa adaijamu aina nunú anuntin aaagtatui, nuninak, batsatkamunmaya aidau utugchata epegtin, Tajimat Nugka Epegtin, Wega Nugka Epegtin aaagtatui.

Art. VI. – Muunta anentai diisa epegkeamu

Jintiin aidauk, jujú papii chicham uminkatin jintiamua nui utugchat aina nunú pachisa ashi jukishbau ataish, ETSA, BIKUT, NUGKUI, MUUN wajintu chichakuita nuna diis nui anentain aan nagkaegas sumamas iwajin aaagtatui.

Art. VII.- Waamak puyatjusa umit.

Chicham akuig tsawan ekea akeakua ematsuk puyatjusa waamak epegtai atatui.

Art. VIII.- Akike atsau.

Chicham iwajbauk akik chichamjuka apugbauk atsawai.

TITULO I AENTSU AYAMKE

CAPITULO I AENTS IWAKU

Art. 1.- Iwaku najaneau

Aentsu pujutjig nuwa ejapja nuwi nagkamnawai. Uchi ejapjukbauwa nuna ayamkesh awai, nudiau asamtai shiig kuitamka ampugnum egketuk tsakapamu atatui. Uchi iwaku akiidauk, niinash antiawai akiijatuau wajiji aina nunashkam.

Art. 2.- Aentsu aidau ayamke

Aentsu ayamke aidau juju ainawai:

- a) Iwaku pujustin
- b) Agkan waitkaschamu atin
- c) Wajigtin atin.
- d) Daagtin, papiinum agatmamjau atin.
- e) Ajantusa diitai atin
- f) Wainka diishtai atin.
- g) Atunitaiji ajitin
- h) Batsatkamua dusha kuitamsa chichamjutai atin.
- i) Utugchat ataish eme anentsa pujutji ayamjusa epegtutai atin.
- j) Suwimashtin, pegkegchau chichagkuish waitkamainchau
- k) Shiig pujau utua waitkaschatin.
- l) Nugka pegkegnum tajimat puju atin.
- m) Awajun asamtai eme diitai atin, nuniak apach pujutnash dekau atin.
- n) Nuwentin, uchigtin atin.
- o) Niish jeentin atin.
- p) Dekaskeapi tusa agkan apajui nemagbaush ajitin.
- q) Ayamkak juig nagkaántsui, Constitucionnum, ley aina nui ayamak pachisa umikchamukait dushakam antiawai ashi.

Art. 3.- Takatan uyumamain.

Aentsuk 18 mijan ajamu nigkish chichamjumamainai, takatnash yainimainai muun wegau asa.

Art. 4.- Takatan uyumamainchau.

Makichkish takamainchau aidau tibuwa duka jujú ainawai:

1. Uchi 15 mijan ajachbau aidauk takat muun aidaunak uyumamait sui, untsu chicham umikbaunum wajina dutikmainai tawa nuna takamainai.
2. Jamantin akiidau asa shiig anentaimag takamainchau asamtai takatnak uyumamait sui.

Art. 5.- Kakaag takamainchau aidau.

1. 15 mijanji ajamu akushkam 18 mijanji eke jegainatsu nunú.
2. Imaanata wajau asa nigki nagkamig chichamjumamainchau aina nunú.
3. Upa akiinau aina nunú.

Art. 6.- Jaamu

Aentsuk iwaku pujau jaka megkeawai. Aents jakamtaig niina patayi aidau dita wajuk ukuumau ainawa dutiksag ukumainawai. Untsu jata achimaja jinamunum jakamua nunak batsatkamu Jintinji pataintin aina nujai chichasbaunum ukunitai atatui.

Art. 7.- Aents megkaekamtai

Aents jimag mijankesh wainkachbau megkaekamtaig ijunjamunum nunú aentsuk megkaekauwai tusa aan papii najana adugtai atatui. Tusa tiagmataig niina wajiji aajakunak niina shiig patayi aidau jukiaagtai.

Art. 8.- Chichamjumamu

Juju aentsuk megkaukawai tusa ijunag chichasa inagnakbau ai wantinak chichamjumak wika iwakjai tumama duka ayu tusa ataktu papii najatku yabaik wantiinkae tutai atatui. Tuja nunik wajantashkam wajijun awagjatjai tichattawai. Duka aentsuk nuwi pujustaj tau asa, ataktu agatmamjau atatui yamajam wayauwa dutikas.

Art. 9.- Ataktu nuwenbau

Aents megkaekamtai ijunja chichasa inagnakbau asamtai ukukbauwa nunú tikishjai aishjidaukesh, nuwedaukesh akuig, juka idaikum yajai pujú wajakuitpa nui wakitkita tutaig achattawai.

Art. 10.- Pujamuji

Aentsuk tuwi batsatkamunum pujawa nunuwai nii pujutaijig. Niish muuntaitkug nii pujamujin agatmamjau atatui. Aents nii pujamunum menag pujachuk tuwi pujau igkuam awa nunú mamiktutai atatui tuke pujamuyi nunin.

Art. 11.- Jujú batsatkamunmaya tusa daaji agatkamu aidau esakatut

Jujú batsatkamunmaya tusa daaji agatkamu aina nuwiya jiinki tikich batsatkamunum we pujustag tutaik utugchatan apugtutsuk ijunjag duke ati tiagmatai jinin atatui. Juka yabaik jininui tusa Pamuk papii najatua akupkamu atatui.

Art. 12.- Kistian aidau

Kistian aidau awajuni batsatkamujin pujau akush, censó awagkamu achattawai, nuigtush juka comunerowai tusa padronnum agatmitkatai achattawai.

Art. 13.- Tikich nuugkanum weu ataktu wakitki wayamu.

Ashi aentsuk tikich nuugkanum weu ataktu wakitki tamtaig ijunag chichasbaunum awayamu atatui.

**CAPITULO II
AENTSJAI BETEK AIDAU NAJANKAMU**

**SUBCAPITULO I
IJUNTUJA TAKATAI**

Art. 14.- Juna taku tawai

Ijunja takatainak aents aidau ijunag najanainawai, tuja ijunja takatai aidaushkam duke duke juunikag tikich nuni muun ijunja takatain najanin ainawai. Ijunja takatai aidauk wiakchameatasa takashtai ayatak yainiktasa takatai ainawai.

Art. 15.- Ijunja takatai atin chicham umikbau

Ijunja Takatai aidauk juna pachisash Codigo Civil Wajintu chichawa nujai betek, jujui Codigo de Convivencia Comunitaria tawa nujai apatka diisa takatai atatui.

Art. 16.- Ijunja takatai najanamu aina duka takatan uwaeki emamainchau.

Ijunja takatai najankamu aina duka batsatkamu takatji aina nuna, GTAA takatji aina nuna, nuniachkush, awajunti anentaimja

batsantaiya nuna wagajus wemaina nunú senchi susamu achattawai.

Art. 17.- Apajuí emematku ijunja takatai

Apajuí emematku ijunja takatai atin najankamua duka, nuna estatutojish wajuk eemkami tusaik najanamuita dutiksag takau atatui.

**SUBCAPITULO II
TAKAT KANAJKAMU**

Art. 18.- Juna jintiak tawai

Takat ematasa aensti junika kanajka, tuki dutikmainita nunú mamikja, wajupa tsawantaik takatash uminkati dushakam dakapatja takat jugattaya nuna pachis tawai.

Art. 19.- Takat kanajka emamu wajupa tsawan atsumtai atatua.

Takat kanajka emamua duka waji pachisa tibauwaita nunú uminkantai idaitai atatui.

Art. 20.- Takat kanajkatnu najanau aina nuna dutikmainji.

Wajintu chichas najanawaje takat kanajka takasmi tusajash, duka ditai awai takat ematnuk. Nuna najanawaju aidauk waji dutikami tibauwaita nuna uyumas ijuntus iwajin aagtatui utugchat jegataishkaim.

Art. 21.- Utugchat iwajku chichamjumamunum

Takat kanajkatin najanamua nunú utugchatnum iyamtai chicham iwajatasa untsumamunmak juna pamukjiya nunú pachiintin atatui, nuniachkush, yana ame chichakta tusa awemainawa nunú atatui.

Art. 22.- Shiig dekaamu

Takat kanajkatin najanbauwa nunak ya batsatkamu aidauk ijunag nuna chichamjuinawa nuwiya jiinkiu atatui papii, nunikmatai, juna takasti tibauwa nunú ashi dekaamunum takatnash emau aagtatui, juna pachis jujú chicham umikbaunum articulo 16 wajintua imatikas.

TITULO II NUGKA, TESAKBAU AIDAUSHKAM CHICHAM NAJATUAMU

CAPITULO I AWAJUN NUGKA

Art. 23.- Awajuni nugke

Awajuni nugkeg dita wajuk nugkan akijua batsatua, tuwiyen egakmas yabaikish ayamjumas batsatua initaik muuntaish nui yujagsamu asamtai, duka imanish ashí dita nugke ainawai. Juna pachis Convenio 169, artículo 13°, 14° aatus tawai.

Art. 24.- Uymat aneakas nugkash, egakmaka ayamjumas pujutai aina dusha takamain

Awajunik ditash nugkentin ainawai, nudiau asa, nui atsumaku egakmasa nujai ayamjumas batsamtai aina dushakam, initaik nagkamsaish nuní batsamsamu asamtai yabaish antsaik emamu awai. Nuní ayamjumaka pujamua duka, baki bakichik aentstí ii wakegamu initaik egakmá wajakbauwa dusha nugka akigka batsamsami tabauchui.

Art. 25.- Dutikmainchau

Awajuni nugkenig maki makichik aentsuk nugka tsaika Titulo suwamu atí tichatnai, untsu juju papii umintsaig awajuni nugken kistian yaunchuk etegkeg batsamsau aina duka ditanu ainawai tutai atinai.

Art. 26.- lik nagkami iina nugke ayamjamu

Awajún aidauk dita dekachbaunum tikich aents dita nugken waitaik nugken ayamjuinak jijja utsain aagtatui.

CAPITULO II AWAJUNI BATSATKAMUJI

Art. 27.- Juna jintiak tawai

Batsatkamu comunidad nativa tabau awa duka aents aidau juunikag bakichik nugka etegkeg batsamas dita takainak wantinjatnunash imatiksag Estadonum agatmamjag batsata nú ainawai. Código de Convivencia Comunitaria tusa jujú papii najanamua duka comunidad nativa awajuni nugken batsatkau aina nunak ashi achiawai.

Artículo 28.- Nugka nájatjamu

Batsatkamu aina duka ditash chichamjumamin ainawai, nunú senchia dui nugka ijuntugbauwai Gobierno Territorial Autonomo Awajun (GTAA) tawa nunú najaná, jui achimka bakichik anentaiyai nugka ayamjin amí tusa.

Art. 29.- Batsatkamush wajukatnaita

Batsatkamu aidauk nii aentsjin yayaak juna aatus takawai:

- a) Dita nugke aidaun kuitamainawai, dutikainak initaik muun batsamsamu aina nunashkam dita muunji nugke asamtai ayamjuinawai juka iinui tuidau asag.
- b) Niina aentsji aidau kajegdaitasuk, aentschau niinitsuk shiig tajimat batsamsatnume tusa chichamjawai.
- c) Awajun wajuk batsamin ainawa nunú, initaik muun jintiamu aidaush, ipama takatash, iina chichamesh, nuni senchi emtikami tusa chichamjawai.
- d) Ichichmamja batsatkamu eemtikatna nuna chichamjawai, duik muun jintiau aina nunú anentaiyai shiig takat anenisa tudaya batsamtsuk emamaina nuna.

Art. 30.- Batsatkamu takatji

Juju ainawai batsatkamu takatji:

- a) Batsatkamunmash aents aidaush wajina takainakug tajimat batsamainaita nuna anentain jintiag umika, chichamjawai.
- b) Batsatkamu nugke kuitamnakti tsuwapashmi tusa, ikam, numi, kuntin, aidaushkam ashi ikamnumia aidauk amuekashti tusa nuna chichamjawai.
- c) Tajimat pujutan, ijuntsa batsamtan, unuimatan, ichichkagtutan, dase kuitamku nuigtush nugka kuitamtan chichamkagtawai.
- d) Ayamjuktatui batsatkamu nugken, antsag ayamjuktatui awajunti nugke muun tepaja nunashkam, nuniak agaya atankagtuktag tiajtaish manituk awaken atatui.
- e) Takakuish jutik kuichik jukimi, shiig antugdaisa takantsati pataa anendaisa, batsatkamush jutik kuitamkami tusa chichaman umijmamak juka uwaekachu ami tusa takau atatui.

- f) Chicham utugchat tepeamtaish batsatkamu pamukjiya duke iwajin atatui juna pachis Constitución wajintua dutiksag, ántsag GTAA Estatotoji chichaa nuna, Justicia Comunitaria Codigojijai apatuk diis.
- g) Aents aidau atsumamun estado yaima nunú segamtinun chichamjawai.
- h) Iwainattawai batsatkamunum pujut unuimakbau aina nunu takainaku pegkegnum wantinjami tusa.
- i) Batsatkamuk juna anuntin aina nunú ichichiajmi tusa takau atatui.
- j) Batsatkamunum batsata nuna kuitamkattawai, tuja ántsag policiakesh tuke aneas utugchatan apujtutaish, nuniachkush, achiktaj tabaunum jegataish pegkejam ataik ayamjus chichamjin atatui.
- k) Aents aidau takainak shiig aneasag, puyatkas batsamainun chichamjin atatui.
- l) Aents tikich batsatkamunmaya wayataj tutaik shiig dekajua ijunjamunun chichaman umikag awayin atatui, tuja awaichakushkam awaichau atatui.
- m) Tikich jumantin aina nunashkam ijunag chichasag dutikmain atatui.

Art. 31.- Batsatkamunum pujut

Jujuwai batsatkamunum pujutak:

- a) Pempeentuniki yainiaku (ipaama takat)
- b) lik anenmamchamu.
- c) Nuwajai atunika takaku yainiamu.
- d) Muun aidau ajantusa diyamu.
- e) Pempeentuniki eme anendaisa niiniamu.
- f) Emetmamja pujusa shiig takamu.
- g) Chicham umikbau aidau betek umiamu.
- h) Batsatkamu chichame, Pamuk aidau chichame eme anentsa umiamu.
- i) Nugka, ikam, numi, tuna tikich wajii eme anentsa diitai aidau kuitabau.
- j) Agkan jamamtuchu kuitamdaika batsatbau.
- k) linia pujut pegkeg aidau wakannumia weantu aidaushkam puyatjusa kuitabau.
- l) Chicham shiig iwaja pujut.

Art. 32.- Batsatkamu aentsji aina nuna ayamke

Juju ainawai batsatkamunmaya aentsji aidau ayamke:

- a) Maki makichik nugkentin abau, nunú nugkanum takainakush ashi amukchagtai, ditanu asamtai kuitamkaagtai.
- b) Pamukjintin abau, dita Pamukjig batsatkamunmaya adaikamui.
- c) Jamamtuchu pujut, papii aujut, yaijatkagmataish (beca) aujut, nuigtú tikich atsumamu aidaun estado yaijatunash jukiagtin.
- d) Tajimat pujustasa egamtai aina nunú juki takamu, juna pachis GTAA num wajintu chicham umikbauwaita aikas.
- e) Batsatkamunmaya pamukji atinnash etegmain, niishkam aiksaik etegkeam amain
- f) Ijunja chicham umiamunmash pachitkau atin
- g) Batsatkamunum pamuk etegkeamunmash, GTAA Pamukji etegkeamunmash pachiinin atin.
- h) Batsatkamunmaya ijunbaunum pachiinak niina chichamesh antugtai atin.
- i) Utugchat ajakuish kajegtsuk shiig mamiksa epegtam atin.
- j) Ijunjami tusash sumamain.
- k) Chicham ajutaish, atsumamu, takat, jatakesh ataish nunú batsatkamunmaya yayam atin.
- l) Yaunchuk pujuta nunash kuitamain megkaekai tusa, nunitaish aikawaipa tutai amainchau.
- m) Dita pujutji emestumain utugchat ataik amesh tu tame tusa iniasa dekagtai atin.
- n) Constituciónnum wajintua, GTAA chicham umikbaunmash wajintua nunú ayamkai chichamjumamin atin.

Art. 33.- Batsatkamu aentsji aidau umiktin

Comunero aidau umiktinuk juju ainawai:

- a) Batsatkamunmaya nugken kuitamainak ayamjukagtin.
- b) Nugka, namak, yumi, kuntin, numi, ikam, nugka initkenianash iina muunji nugkenianak ashi ayamjuk kuitamkagtin.
- c) Awajuni nugke aidaunak initaik iinia muun batsamajakú aina nunashkam ayamjuk kuitamkagtin.
- d) Chicham umikchamu aig uukag numinakesh, kuwinakesh, tikich wajinakesh takagtaik ashi amuekamtai waittsaig tusa Pamukui chicham egketmain.
- e) Iwainatsuk uuka, atsumaku egamka ayamjumasa batsamtai aina nunú sujuja emashtin.
- f) Uchi tsakat aidau, datsa aidaushkam iinia muunta pujutjin jintintak, apiija najantai aidaun, tikich waji aidaun iinia takajaku aina nuna jintintuawagtin.
- g) Duik muun augmattsamu aidaun, pujuta, takata pachisag uchi aidaun jintintuawagtin.

- h) Batsatkamunum maanitsuk agkan batsatbau ati tusa chichamjukagtin.
- i) Ijuntuja takamunum yaimin atin, batsatkamunum takamain atsumnataik niishkam yaimin atin.
- j) Batsatkamunum shiig iwaja tsuwat atsaunum pujutan yaimin atin, pegkeg mayati pujuntsati tusa.
- k) Entsa aidau, namak aidaunash, tsuwapachagtin.
- l) Tikich jumantin umiktin aina nunashkam batsatkamu atsumtaik takajin agtin.

Art. 34.- Awajuni batsatkamuji ayamke

Awajuni batsatkamuji ayamkeg juju ainawai:

- a. Batsatkamu aidauk awajunti tumabauwa nui ijutkau aagatui, ashi batsatkamu aidauk eme anentsa diyam atatui
- b. Utugchatnash nii epegmain ataik chicham umikbaujai betek epegken atin.
- c. Constitución Perú najanamu chichaa nuna aintus, tuja juju chicham umikmawa nujai betek ditash pamukjintin, anentain jintiajag takau agtin.
- d. Awajun aidau ijunjag chichainamunum pachiinak anentaimtan apujin atin.
- e. Batsatkamu ijunag chichasag juju código nugka pachis wajintu chichamjawa dutiksag dita nugkenia aidaunak takamain ainawai.
- f. Dita wakejamun takatsuk juju código chichaa nuna dutiksag nugkanash tesagdaikag takamain ainawai.
- g. GTAA anunkatin etegkeg adaijatatus ijunbaunum niishkam pachiinak wika juju ati tajai tusa iwainamain.
- h. GTAA yaimtan chichagkagtakushkam bakichik batsatkamua duka aagka idaibauk achatin.
- i. GTAA yayam atin ayamak aina nunú pachisa chichamjumamunum, estadojai chichasa eemkatna nunú sumamunum, tsuwat chicham tepeamtai ayamjuniktag tabaunum.
- j. Mai batsatkamuk nugkanum utugchat ataik GTAA mai apatuk diis shiig mamikis epegtuattawai.
- k. GTAA iwainakbau atatui tuwig chichamkagtamua ainta nui, nuniak, aiksaik ipatai atatui niish anentain apujak pachiinati tusa tuwig chichamu ainta nui.
- l. Ujam atatui waamak awajuni nugkén tu takat emamu awa nú, waji utugchatak awa nú, nuniachkush, tuki yaimainush igkugka

emamush ayawa nunú pachisa.

- m. GTAA takatjinash apu aidau takatjinash diyaku aagtatui, utugchat ataik wainak chichama tsuwapatsuk shiig mamikis juju código wajintu umikmawaita nuna diisag chichama egketuawag iwajin aagtatui.
- n. Tikish ayamak aina dusha antiawai.

Art. 35.- Awajuni batsatkamuji aidau umiktin

Juju ainawai awajuni batsatkamuji aidau umiktin:

- a) Ijunag chichasag chichama jintiajag nuna takainak GTAA senchimtikin atin.
- b) Tajimat batsamsatnun GTAA chichama umikmataig, dita diisam pegkeg ataik aatus takat weti tusa titin.
- c) Awajun aidau ijunag chicham umikbau aina nuna antujin atin.
- d) GTAA tajimat weti tusa chichamjin aagtin.
- e) Tikich batsatkamu aiduajaish utugchatan apujtunitsuk antugdayas takasagtin nugka tesagdaikamu aina nuna ajantunisag.
- f) GTAA ukuinak yaja ayampachagtin.
- g) Awajun pujut megkaekai tusag uchi aidau unuimajagtinun najatuawag chichamjuk eemtikin agtin.
- h) Ajantus diin agtin GTAA anunkati tusa ijuntusa adaijamu aina nuna.
- i) GTAA ipamamunum dakimtsuk pachiiniagtin.

Art. 36.- Batsatkamun aentsji aidau

Batsatkamun aentsji aidauk aishmag, nuwauch akush nú batsatkamunmak akiinau aina nunú ainawai. Tuja tikich batsatkamunmayakesh, nuniachkush, tikich indigenakesh, juju batsatkamunum pujustajai, wajuk pujuk ainagme nunash umiktajai, juju código wajintu chichawa nunashkam umiktajai taushkam, awayam pujak, jushakam batsatkamu aentsjiyai tutai atatui.

Batsatkamuk papii niina aentsji daaji agattai ajittawai. Batsatkamu kampuji kanawe aentsji aina duka agatmamkau aagtatui batsatkamu namuja takaka nuna papiijin.

Batsatkamu aentsji atatus wayá duka, agatmikatai atatui papiinum, juka batsatkamu aentsji wajase tusa agatmikatai aina nui, nunú dutikatag takuishkam ijunjamunum tibau atatui, nua nui aents tuwaka nunú jimaituk nagkaegas ayu tiagtai.

Art. 37.- Batsatkamu aentsjish wajuk akanjamuita

Batsatkamu aentsji aidauk jimag niimtin akanjamui:

- a) Nigki chichamjumamain aidau. – Juka aishmagkesh, nuwakesh mijanji 18 ajuidau batsatkamu papiijin daaji agatmamkau, nii umiktinush, nii ayamjumkatnush iwaintugbau aidau asantai nuna antus takainak batsata nunú.
- b) Nigki chichamjumamainchau aidau. – Juka uchi tsakat, aents muun imanik takatnumash, chichamnumash atujatmainchau asantai ayamsatnume tibau aina nunú ainawai.

Art. 38.- Batsatkamunum pujustasa umijmamkatag tabau

Batsatkamunum nigki chichamjumkatin aidau agatmitkagtag tabaunum jujú uminkau amain:

- a) Nunú batsatkamunum akiinau amain, nuniachkuish, awaiku agatmikagbau amain.
- b) Emetnaja bakichik mijankesh pujau amain.
- c) 18 mijan ejebau ajutkagtumain amain.
- d) Uchi tsakatchishkam nuweedauwa nunú.
- e) Tikich batsatkamunum agatmamjachu, yamaik jiinui tusa papii najatua susa akupkamu amain.
- f) Bakichik utugchatjigkesh atsuju amain.

Art. 39.- Tuke pujuschatin aidau umigkamu

Aents ajantia batsatkamunmayanum pujuwaitak ujumak tsawan pujustatus tikich batsatkamunum waya tuke ijag puja nunú. Duka ijunbaunmash pachiinmainai, anentainash apugmainai, chicham umikbau aina nunash antuk takamainai, tujash chicham umiamunmag pachiinbaitsui, antsag daajish agatjamuk achattawai.

Bastatkamua duka papii ajumainai, ajantia taakui daaji apugtua adugtutain, shiig diisa yaki wayawa tusa dekatag tabaunum.

Art. 40.- Batsatkamunmaya aidau dekapaja daaji agattai

Batsatkamuk papii censo takatai ajittawai. Nunú papiik cinco mijan jegakui yapajitai atatui ataktú agatmamainaku, nunú papii GTAA susamu atatui ashi awajuntish wajupaitji nunú dekaamu ati tusa.

Art. 41.- Nunú batsatkamunmayachu weamu

Aents comunero aajakbaun mekgaga duka juniak nuniawai:

- a) Nunú batsatkamunum pujuschatag takug wika juwi pujuschattajai tusa papii agag, nuniachkush chichamaikish ijunbaunum iwainmamkauwa nunú.
- b) Jaka nunú.
- c) Shiig iwainak wetsuk tikich nugkanmagkesh wee makichik mijankesh megkaga nunú.
- d) Tikich batsatkamunum agatmama nunú.
- e) Nuwiya muun aidau niina pujutjin diijus ajapamu aina nunú.

Art. 42.- Juka batsatkamu aentsjichui tama atin

Juka juiya batsatkamu aentsjichui tabau atatui, ijunjamunum aents jimaipituk nagkaesau tuwaka juka jiinkiu atí tusa chicham umigkamua nunú.

Art. 43.- Juwiyachui tama achatin

Batsatkamu aentsjichui tama achatin:

- a) Papii aajak, nuniachkush jaak ampimatatus wekagak batsatkamunum pujatsu nunú.
- b) Suntagmagak wekaga nú.
- c) Tikich nugkanum takak wegak pamukui chichama umika papii agagbaun juki wekaga nunú.
- d) Chichamkagtak yujá nunú, papii unuimaju aidau yaijatak yuja nunú. tikich takatan takak wekagushkam.
- e) Aents nigki kakaag chichamjumamainchau aina nunú.

Art. 44.- Uchi pipiich, tsakat aidau ayamke:

Batsatkamua duka, GTAA jai atuegak uchi pipiich, uchi tsakat aidaunash kuitamui initikish wajuk kuitamá wajakmawaita, wajuk chichaju wajakmawaita imatikas, juna pachis Constitución wajintu chichawa, Convención uchi ayamke wajinntu jintiawa nujai betek emak. Nunú chicham umikbau aina duka aatus tawai.

- a) Uchi aidau ayamke chichaak: lwaku, jamamtuchu, waitkascham, agkan pujustinme tawai.
- b) Nugka pegkegnum tsuwapachbaunum pujus tsakagti tawai.
- c) Batsatkamu eemkati tusa chichamjamua nuwishkam uchi atsumamujish pachikbau atin.
- d) Estadokesh, GTAakesh, batsatkamukesh papii augbaun pachis chichamjamunum pachikbau agtin.
- e) Uchi aidaush tunak atsumainawa dushakam iniasa antugkau atin.

- f) Pegkeg pujutan unuimainak, anentaimtanmash, wakannumash katsuaju atinme tusa yaikagtin.
- g) Papii augbaunash niina chichamenig ausatin
- h) Dita muunji, augmattsamu, jintinkagtuamu, takasbau, aidaun ayatak chichamaikish, nuniachkush agagbaunakesh jukiag aujuinak unuimajagtin pujut pegkejan.
- i) Uchi ainawai tusa pachitsuk idaitsuk dita wajuk anentaimua nunú antugkamu atin.
- j) Uchi aidauk wajuk ayamjumsa pujusaiya tsakanua batsatkamunmash nunashkam unuimatuinak shiig dekau amain aidau, nunisag takat unuinakuishkam wainka nii dutikmainchaunum emamu achatin, nuigtush bakumamain wainiatku takat idaitusu achatin, antsag, wainka najasa diyam achatin.
- k) Uchi tsakat aidau wasugkamtai, unuimatai, takaku unuimatai aidaun emainak jamamtuchu waju tsakaimain aidau.
- l) Shiig yuwa, pujak papii aujak shiig kuitamkam pujus jamamtuchu muumpagtin.
- m) Uchi apagtuchu, dukugtuchukesh ataik batsatkamu aentsji aidau kuitamkagtin.
- n) Uchi kuitamain atsutaik makichik muun nuwi pujukesh wi uchijimatjai takug uchijimainai, piipichinakesh mumpajunakesh.

Art. 45.- Batsatkamu nugke

Batsatkamu nugkeg tituló awakamu aina nú, junak cedido en uso amajai tusa, justashkam área fiscal puuka amajai tusa estado sukagtusbau aina nujai ijumam wajupaita nunuwai ashi ijumag batsatkamu nugkeg, atus chichawai Convenio 169 OIT agabauwa nuishkam, tuja tikish tratados aidaunum perunumia estado umijmankauwa nuishkam.

Art. 46.- Batsatkamu nugkeg awajunti nugkega nui ijutkawai

Batsatkamu nugkeg awajunti nugkega nui ijutkawai. Nugka agkan tepaju aina duka ya batsatkamuk ijus pujawa nuna egakmasa yutai aagatui, wajuk initikish yujagsamuita nunú diisa.

Art. 47.- Batsatkamu nugke aidau tinamja takamu

Batsatkamuk aentsji kawetai batsamak wemaina nuna nugkanak mamikmain ainawai. Antsag, niina aentsji aidaunash aja takasa yuwa pujustinun, ajak ajakmaka sujuktinun tinamkau atatui nugkan.

Art. 48.- Nugka inagketbau

Wajuk initikish nugkanash inagketdaya ajakú ainawa dutiksaik yabaish inagketdaitai atatui. Pamukuk aentsji batsata nuna nugkan apuputun susau atatui nui ditash atsumkas ajagtin atinme, jee jegamka pujumainjish ajitnume tusa. Namputchawa, bakichik aentskesh nugka atsumjamtaig, ijunjamunum chichasa sutai atatui nugka egatka.

Art. 49.- Yaunchuk nagkamsa nugka takasa minamunum.

Yaunchuk nagkamsa nugka takasa minamu tabauwa duka juniamunum atina nuna tawai:

- a) Makichik awajunkesh nugka eke tituló awajuinatsaig nii yaunchuk nagkamas takataijiya nuna tawai. Nuniamunum bakichik batsatkamu dajin niina nugke atinun tituló awagkamtaig, aents yaunchuk taka pujuwa nunak nugkan mamiktug amesh takam aiksamek takagmasta tusa aagtua idaitin atatui. Tujash nunú aentsuk nugka mamiktugbauwa nuna uwaekag taka takakuag ememait sui.
- b) Bakichik batsatkamunmaya aentsji juunikag nugka agkan asantai aush akijuami tusa batsamjua título jijiki nugka akigbauwa nuna tawai. Juka nú aents aidayatak chichasag nugka jutik kuitamkami tusag ditak nagkamiag chichamjukag nugkan tituló awagkaju asag, dita ditak ijunjag chichama umikag wajuk antugdaika takasmi tusaya jintiinawa dutiksag umimain ainawai.

Juju artículonum agagmawa juka aents nugka titulachbaunum pujus takajaku aina nuninchau tuke aneas comunidata nugken atankitag tusa wainta nuna chichamjak tatsui.

Art. 50.- Batsatkamu nugke kuitabau

Batsatkamu nugkeg pusaikesh, takamchaukesh bakichkish akanbaitsui. Aantsag tsagkabait sui, sujutkesh sujubait sui. Batsatkamu nugkeg diwimkagtaku iwasmataig achattawai, nuigtushkam nugka ayamkeg esakautbaitsui.

Art. 51.- Nugka tsagkabau

Batsatkamu nugken, estado, escuelanakesh, ampimatainakesh, peem tagkumatnunakesh jegamjuktatus nugka atsumakuig ayatak tsagkattai atatui.

Art. 52.- Namaka tugkitkaji

Namakian Kayaman, kayanakesh, nugkanakesh juagtaik batsatkamunmaya Pamuk, comunero aidaujai chichasag akikmaktajum iman bakibakichik metro cubico titatui cominidadnumian juwau asamtai.

Art. 53.- Chicham apakbau betek umiamu

Gobierno Territorial Autónomo Awajún, jujuwai Awajun aents aidaun apujimtaiji, tikich nuna nagkaesauk atsawai. Gobierno Territorial Autónomo Awajúnia juwi chicham umikbauk ayatak idaitsuk betek umitai atinai.

Art. 54.- Anenjauch takamain

Constitución, GTAA, Convenio 169, Naciones Unidas Declaracionji, tuja nuigtu tikich papiinumashkam indigena aidau pachisa agagbau aina nunú ashi ijuntuja ayamjam awai batsatkamuk niina aentsji aina nujai.

Art. 55.- Batsatkamu nugken juukmasa atsumaku umijmamtai aina nuna ayamke

Batsatkamu nugkén atsumaku juukmamtai aya dushakam niinuke, wagki, initikish nuiya yuwa yujakbauwa nudiau asamtai, nuniaku, yabaishkam nunú nugkanmayag yuwa batsamsa eemta dusha chichamjumamu asamtai.

Art. 56.- Nugkanum ayaa duka aents nuwi batsamin aidaujai achitkawai

Yumi, nugka, nugka initkeniash, numi aidaush, ajak tsuwamatai aidaush, kuntin namakia aidaush, ikamia aidaush, ashi ju aina duka batsatkamu aina nuna atsumtai ainawai. Jujú aina duka iina muunjish wajuk jintinjamaukita dutiksaik atsumakuish takatai ainawai.

Art. 57.- Atsumaku takagmatai aidau

Batsatkamu aentsji aidau atsumainak takagmataiji aidauk dita nugke tiutuló awagmakbaunum, titulachbau ataishkam initaik nagkamas batsamtukaju asag nuwi ditak ajaka ajakmainak, kuntinun egapainak, yujagke juuka yuwinak, takainak iwaku batsamin asagmatai dita nugkega duka shiig ayamjukbau ainawai.

Art. 58.- Aents tikich nugknmaya aidau awajúni nugken batsamawagbau.

Batsatkamu perúnmayachu tikich nugkanmaya aidau Perú nugke nagkatkamunum, awajuni nugken untsanawag batsataidauk, cancellerjai chichasa jiigbau atatuí, GTAA pachinak niish niibaunum.

**CAPITULO III
KISTIAN AENTS BATSATKAMU.**

Art. 59.- Juna taku tawai

Kistian aents aidauk españánmaya chichaman chichaaku aidau nuniachkush dita wegantukesh awajuni nugken nuwenawag yatsuta nunin waigka batsata nunú tabau awai.

Art. 60.- Nugkena pujamu

Tsawan 6, nantu noviembre, mijan 2024 jegatsaig nugke tituló awajamu aidauk nunisag atatuí. Untsu nugka titulachbau aidaunak GTAA papiin nugka pujujuamua nuna pachis susattawai. Nuwi nagkamsa wega nugka aina nunú batsamtuka weamuk atsuttawai.

Art. 61.- Nuw wega nugkenig batsatu asa antugdaika batsamsatin.

1. Kistian aents aidau yaaktaji aidaunak GTAA catastro umikmatai nunú diisa tesajuamu atatuí. Kistiani yaaktajin nugka tesaamu GTAA certificado de posesión susattawai, nuna juki tituló awagbau chichamjumkatin asamtai.
2. Kistian aidau yaaktamachbaunum batsata duka ajakmataiji aidau diigsa nugka pujugbauwa nunú tesajuamu aagtatuí. GTAA susattawai constancian nugka tesajuamua nuna pachis, nujai papiijin shiig umimain asagmatai.
3. Juju nuga aidauk nugka chichamjin GTAA adaikamu aina nunú nugkennujai wekaetus, nugka nagkatkamunum shugku ajigka nunú dutika takatai Sistema de Información Geográfica (SIG) tutaiyai nujai shiig dakapamu atatuí.
4. Kistian aidauk dita nugke tesamua nuwig dita wajuk takas pujustag tuinawa nuna dutiksag takamain ainawai, tujash nugkan tsuwapamainchau ainawai. Tujash nunú nugkanak tikich aents wainchatai aidaunmak sujukchaagtatuí unstu sujuktatakug awajunin sumainai, dutikachkush tikich nuna yantamen batsatkau aidaunmagkesh sujumain ainawai. Eke sujutsuk nugkan sujukttag tajai tusa GTAA ujaktaui.

5. Kistian aidau maki amkichik kanakag atushat batsamin aidauk juju nugkanum awajuni nugken batsatui tusa nugke tesajua Certificado de Ocupación susamu atatui.
6. Awajun nugkanmak Centro Poblado de Municipalidad tutai aina duka najannashtinai.
7. Kistiani nugken aents nuwiyachu utua waitkamak nigki jiimainchau dekapeakug awajunin atutkatajum tusa segattwai.
8. Kistian aidauk awajunti nugka ashi ijumjaish wajuk mabiikaya takau ami tusa emamu awa nuig niish pachiinak yaimkattawai, nuniak ajantus diistatui nugka akanja juní takau ami tusa tibuwa nunú umintaishkam.

Art. 62.- Municipalidad aidau pachisa tibau

Municipalidad Awajúni nugken najanamu aidauk, takainakush, ajantus diisu aagtatui awajunish niina nugkenish wajuk chichakan pujustajai tawa nuna.

Art. 63.- Ijunja pujut

1. Awajúnik kistian aidaujaig chichama antugdayas batsamin agtinai.
2. Awajunkesh, kistiankesh dakitnayinak utugchatan aepjuniawag waitkanischagtin aidau.
3. Kistian aents aidau awajun aidaujai shiig chichasag antugdayas batsamsatatakug awajun chichaman unuimajagtinme.
4. Kistian aina duka ajantus diisu aagtatui awajunish wajuk pujuwaita, wajuk iwainmamnaita, wajuk unuimakuita, ashi nuna.
5. Awajúni nugkenig, awajun aidauk niina jenigkish, niina nugke tesajuamunmagkesh, nugka sujin, cocan uuka takau, uumak kuwi takau, aents magkagtin aina nuninnakesh awaya apujuk makichkish atsuttawai, nuna dutikakug jiiki ajapeam atatui.

Art. 64.- Diijattsatna nú iwagbau

1. Kistian aents, awajuni nugken pujuidaunak nii pujamuji shiig dekajuamu atinun, GTAA susattawai Carnet de Identidad Interna (CII).
2. Kistian dita yaktajin dita apujimatnunak adaikag antujin aagtatui.
3. Kistian aidauk dita batsatkamunmag ditak ditak wajuk antugdayas batsamsattawa nuna ijunag chichasag umiinak aentsjinash emetug batsamsau atatui.

4. Kistiankesh, nuniachkush awajunkesh utugchatan apujtusmak awajuni chicham epegtainum epegnattawai antigbauwa nunú atus wakegamu akuig. Aentsu ayamkeg wasugkamait sui, nuadui eme anentsa utugchat akuish epegtamu atatuí.
5. Mai Kistianik utugchat ajakuig dita chicham iwagtaijin iwajaagtatuí apachnum.

Art. 65.- Eemat pachisa chichamjumamunum pachiinmain

1. Eemkata tusa ijunbau

- a) Kistian aidauk, GTAA ijunja eemat pachisa chichamunmash dita aentsjin pachia chichamjumin aagtatuí.
- b) Kistian aents awajuni nugken batsataidauk censo takatain GTAA umikbauwa nuwi dita daaji agatjamu aagtatuí.

CAPITULO IV

NUGKA UJUIGKAJI

Art. 66.- Juna taku tawai

Nugkanum juukmaka atsumaku takatai aina nuna pachis taku, nugka ujuigkaji tawai.

Art. 67.- Nugka ujuigkaji juwakuish ashi amumainchau

Jujú ainawai nugka ujuigkaji ayá nuwiya atsumamu juakuish ashi amutsuk kuitamain aina duka:

- a) Nugka, tuja muja aina dushakam.
- b) Ashi numi aidau
- c) Ashi kuntin aidau
- d) Namak, entsa aidau, tuna aidau, yumi, yumi nimpain initkanmaya jiinin aidau, kucha aidau.
- e) Umukai aidau.

Art. 68.- Nugka wekaetusa ijagmain aina nunú

Batsatkamu aentsji aina duka jinta shiig jintama ajantia ijainak niimak yujastinnash umiku amainai. Pegkeg iwainamain asamtai nuna diinak kuashat ijag utsanbau ataik, dekas jujú aina nunú diyamunum akikmaku atinme tusa chicham umiakjish, tuke aneasa kuashat akik

chichamjutsuk, wajupa juju aina nunu kuitabaunum tsawan megkaebau awa nunú diisa akikesh apujtusu amainai.

Art. 69.- Nugka kuitamat

Nugkanum ajakmakuish initaik muun takajaku aina numamtuk ashi pakai ikam amutsuk mamiksa takatai atinai.

Art. 70.- Nugka takatai tesagdaibau

Maki makichik aents batsatkamunum emetnag batsamin aidauk dita takasag ajapawag yuwatin aidauk, ashi tesajua susamu aagtatui. Ijunag chichasag chichama umikaju asag, batsatkamunmaya Pamuk nugkanak tesaka tinamkagtuktatui.

Art. 71.- Awajunnum batsatkamunmaya nugkeen takamu.

Awajuni nugke ijuntusa takatai aina nuwi kuichik jukitasa apu aidau dekachbaunum uuka takamuk achatnai. Awajuni nugke titulachbau aina nuwi takastag tabau akuig GTAA ijunag chichama umikagmatai dutikmainai,

Art. 72.- Takanchastin

Batsatkamunmaya aidau nugken, ashi Awajun aidau nugkenish shiig chicham umikchamu aig takamainchau aidauk juju ainawai:

- a) Kuwi uumka takamua nú.
- b) Namaka nujinchi weaju aina nuwi takastinme tusa tesagmainchau.
- c) Pukuni aidaunum kuwi takamainchau.
- d) Kuichik jukitasa numi tsupika uuka sujumainchau.
- e) Coca, amapola nuniachkush tikich jumamtin aentsu pujutjin emestin aina nunú.

Art. 73.- Muja aidau

Muja aina duka chichamjuka shiig kuitamkamu atatui juju dekaidau asa.

- a) Wakannum ichishmamjatasa ayamtai asamtai.
- b) Nuiya tuna najanea nebau asamtai.
- c) Mujanmaya yumi saeki namak najanen asamtai
- d) Kuntin aidau yujataiji asamtai.

Art. 74.- Initaik muunta jetenke aidau

Initaik muun aajaku aidaun jetenke mujá ayá duka shiig kuitamkamu aagtatui dutik nugka akijka minimú asamtai, nuigtushkam, nunui batsamsa unuimaka yujakbau asamtai. Juka ashi ijuntusa

kuitamkamu atatui. Bakichkish juka mínawai tusaik batsamtukaik emashtinai nunú nugkanum apachjui batsamajaku akuishkam.

Art. 75.- Muja aidau waitkaschatin

Nunú mujanmak ayatak wakannum ichishmamtan egaktajai tusa batsatkamunmaya Pamukjai chichasa waitai atatui.

Art. 76.- Yacha aidau augtutai

Kuntin, numi, ajak, aidaun augtustajai tuinakuig, shiig chichasa nunú dutikamunum Awajuni nugke kuitamtanum yaijatmain akuig wayawaagtatui, tujash kuashat tsawantak batsamtamuk achattawai.

Art. 77.- Tikich wajigkes dutikatasa mujanum wekaetai

Juukmatai aina nunú takaamash akiinak wegau asamtai kuitamsa takatai aina nunú diissa takasmi tusa muja utuataj tabau akuig dutiktai atatui GTAA num ijunjamunum ayu tabau akuig, nunisag batsatkamunmaya aidaushkam dita ijunjamunum ayu tabau akuig.

Art. 78.- Ankashti tibau

Nugka kuitamkamu takashtai ati tibaunmak makichik ajakesh takanchashtinai.

Art. 79.- Numi aidau

Ajak aidau, numi aidau, tuntuam, kugkuk, shimpi saké aina nunú ainawai numi aidau tabau aina nú. Juka Awajún chichamnumak IKAM tutaiyai.

Art. 80.- Numi aidau ashi amuegak wegau

Kaap aina nunú, yujag numi aina nunú kakajus igkumain wénatsu nudiau asamtai ajantusa egamka juki takatai atatui, antsag, atsumaku juukmakuish ashi amumashtai atatui. Baki Bakichik batsatkamunmaya aents aina duka nii yuwamunum numi jigkayin yajuak ajau amainai.

Art. 81.- Yujag kuntu yutai aidau

Ikam kanaku yujatainum, nuniachkush, wekaesa egamtainum, nuniaku ayamjumsa pujutash unuimatainum, yujag aidau, chigki aidau, kuntin aidau kuttai aya duka emeschatai atatui. Baki bakichik batsatkamunmaya aentsji aidau juju códigonum chicham umikbauwa nuna imatiksag numi aidau, kuntin aidau amuekai tusa puyatjus kuitamkaagtatui.

Art. 82.- Yujag aentsti yutai

Yujag aentsti yutai aidauk bakichkish ajankashtin, ayatak kuitamkatin. Baki bakichik muun aidauk yujagke ajá yujatsuk dita ajajin, agajin, yujag aidaun, tuntuam weantu yutai aidaunak ajakmatnume. Uchi papii aujuina dushakam jutik takata nunú jintinkamu atatu.

Art. 83.- Ikamak achiniakui kuntin aina nujai

Ikam weajunum kuntinuk batsamin ainawai, ditak nuwiyen yuwinak, anenjas batsatui. Ikam atsutaik kuntinchakam atsawai. Nunin asamtai, juju chicham umiaku wajuk takasmi timawaita nuna betek umiachuk, Còdigo de Justicia Comunitaria Awajún umikmawa nujai betek suwimkan jukittawai.

Art. 84.- Ikamak yaya, nantu, etsa, aidaujai achiniaku

Numi, ajak, tsawan dekatai aidauk shiig kuitamkamu aagtatui, nunú diisa tsawan yapajinush deká umintai asamtai.

Art. 85.- Ikama duka achiniakui dasejai

Ikamak batsatkamu aentsji aina nunú dita muunji jintintuamu asag wajuk takas batsamin ainawa dutiksaik kuitamsa takatai atinai. Ikamnumia dase shiig pegkeg mayati batsamin asa, eme anentsa puyatjusa kuitamtai atin.

Art. 86.- Ikamak yumijai achiniaku

Entsa jinagbau aidaunum ikam antigchamu aina duka makichkish waitkashchamu atatu. Juna umitsuk batsatkamu nugken emeseakug niina akiktatui, untsu nugka sumakchamunum emeseamu ataik, dushakam awajuni nugke asamtai GTAAn akiktatui.

Art. 87.- Ajak tsuwamatai takastin

Batsatkamunmayag initaik dita apachji ajak tsuwama wajakbaunak, nuniachkush, nuna umak anentain ichichi wajakbau aina nunak dutiksag takasaagtatui.

Art. 88.- Kuntin aidau

Kuntin pegkeg yutai aidau awajún nugkanum batsatkamu nugken ayauk, atsumaku maa yutai atinai. Kuntin yuchatai aidaushkam ikamnum tuke batsamin asagmatai ayatak idaisatin.

Art. 89.- Kuntin kajen aidau

Kuntin ikamia kajen aentsnash, tagkunash waitkamain aidauk juju ainawai:

- a) Ikamyawa: Kaich, puagkat, shayashia, untucham.
- b) Dapi esajatmatai jatai aidau

c) Semagkau, shuwin pagki.

Art. 90.- Kuntin ishamain aidau kuitamain

Kuntin ishamain kajen tagkunakesh maumain ainakush waitkaschatin, tuke aneasaish maashtin, untsu, nii jetejatkui ayamjumaktasa maumainai.

Art. 91.- Ikamia kuntin maa sujushtai atin

Ikamia kuntin aidau wiakchameatasa, kuashat maa sujunkashtin, untsu batsatkamunum pujusa yuatnuk mautai atatui, tuja nii nuna nejen, atsumamun sumapaktatus akanas sujuktag takug dutikmainai.

Art. 92.- Yuwa pujustin kuntin egaka maamu

Yumain atsakui atsumaku kuntin egamka yutak tuke dutiktai atatui. Tujash duke wekaetusa ashi amutsuk, kuntin yujakti tusa idaisatin muun wajuk egamak yuujaku ainawa dutiksaik. Initaik muun aidau egamak yuinakush ashi amuka ematsuk shiig kuitamas dutikajaku aina nunú unuimagtin jintidayatin chichamjukbau atatui. Kuntin maamu pachisaik dakumka iwaina wekaechatin.

Art. 93.- Tikich batsatkamu nugkenia ujanitsuk kuntin maamu

Kuichkijinatjai tusa tikichi batsatkamu nugken inimtsuk wayá kuntin maamu, namak maamu, numi tsupiamuk bakichkish atsuttawai.

Art. 94.- Kuntinu petsatai aidau wekaetusa waitkaschatin.

Muja aidaunum, kuntinu petsatai aina nuwi wekaetusa kuntin maa sujamuk makichkish atsuttawai. Untsu jistakesh jegakui ijuntusa yuwatin egamtai atatui, tujash dushakam aju ajumag egamchatai atinai.

Art. 95.- Namak aidau

Ipati namak maamuk atsuttawai. Antsag, patimtai namak mautai aina duka sujushtai atatui.

Art. 96.- Namak aidau tsuwapamunum

Awajuni nugken batsatkamunmaya aidaukesh kuichki jukitasa takajai tusa etsegtsuk takaak nugka tsuwapakug juju suwimkan jukiaagtatui.

1. Batsatkamu aentsji:

- **Yama nagkamchak chichama umikchag:** 7 tsawan epeknun egkemattawai.
- **Ayatak wetaik:** 7 tsawan ataktushkam epeknun egkemattawai, nuniak akikmaktatui S/ 200.00.

2. Batsatkamu muunji:

- **Yama nagkamchak chichama umikchag:** 10 tsawan epeknun egkemattawai.
- **Ayatak wetaik:** 10 tsawan epeknun egkemattawai, nuniak akikmaktatui S/ 300.00.

3. **Unuimaju takatjintin batsatkamunmaya:**

- **Yama nagkamchak chichama umikchamtaig :** 48 horas epeknun egkemattawai.
- **Ayatak wetaik:** 48 hora epeknun egkemattawai, nuniak S/ 500.00. akikmaktatui.

Art. 97.- Entsa aidau

Entsa aina duka nugka initkenia jjinainawai:

- a) Aentsti uwajagtin
- b) Kuntin aidau uwajagtin
- c) Namak piipich aidau batsamta aiinawaai
- d) Bichamchat ikaman emau
- e) Namak muunta nuna jinti ainawai.

Art. 98.- Entsanmaya namak maamu

Entsanmaya namak maa yuwataj takuik iinia muun maa yuujaku aina dutiksaik mautai atatui. Muun dutikajakchamu namaka ashi ijinmain aidaunak entsanmak bakichkish ajuntuashbau atatui. Wajupa tsawan weaku, tuja wajuku maa yutai atinaita nunak batsatkamu ijunag chichama umikaagtatui. Baki bakichik batsatkamunmaya aidauk tikich apu tujutmatai dutikatjai tutsuk niina batsatkamujin ijunag chichasag entsa aidaunum namaka pegkegchau emamain aidauk makichkish takanchasti tusa umiktatui.

Art. 99.- Dutikashtin aidau

Entsa aidau tsuwapashbau pegkeg ati takuik juju umiktin:

- a) Tsuwat aidau, plástico aidau, entsanum utsaumainchau, iina muunji jintiawaju aina dushakam umiktin.
- b) Tsegas weantu entsanum batsamin aidaunash ijinmain, tsuwapamain aidauk bakichkish ajugchatin.
- c) Entsa akaetaiji aidau wainka tsuwapatmainchau nunú pachisa shiig autuskek.
- d) Namaka ajugka ipattai aidaun entsanum ajuntuk juju papiinum, tuja código de justicia comunitarianmash chicham umikmawa dutiksag suwimkan jukittawai.

Art. 100 .- Batsatkamunmaya atsumainakui dutikmain

Peem tagkumatasa atsumamu asamta batsatkamu ijunag chichaman umikagbau akuig, tuna detaju aina nunú aujtusa diisa

epenka peem tagkumtai atatui, tujash nunú dutikakuish nugka tsuwapatsuk najantai atatui.

Art. 101.- Kucha aidau

Kucha aina duka namaka yujatai ainawai, nunin asamtai, muun aidauk kuchan jintanak niimjin ainawai, nuwiya namak yujaku maa yutai asamtai. Kucha aidauk namakjai achiniaju ainawai, nunin asamtai batsatkamu aents ainag nuuti kuitamkamu atatui, wajuk chichakaiya kuitamka minaji imatiksaik.

Art. 102.- Sujimkamu

Muun aidau kucha aidaun pachis jintiawajua duka juju ainawai:

- a) Kuchanmak namak maata takuish apach tsegas najanamua duka ajuntai achattawai.
- b) Kuchak yaunchuk aajakbaunak nunisag emeschatai atinai.
- c) Kucha yaunchkesh initaik muuntash dutika wajakú asamtai nijatag takuish shiig dekapa diisa nijatai atatui.
- d) Kucha bakichkish nijashtaig bakichkish nijamainchau, nuna dutikauk suwimka jukitin.
- e) Kuchan waitkauk, Código de Justicia Comunitaria Awajún wajintua nuna imatiksag suwimka jukitin chichama umikchau asa.

Art. 103.- Kucha aidaunum namak maumain

Kuchanmaya namak maatatakuik initaik muun jintiawaju aina nunú diisa namak mautai atin:

- a) Agsea ajunka maatin
- b) Arpogkai iju maatin
- c) Tarrafa nagkia maatin
- d) Wajuk mautai ati tusa batsatkamu chichama umikagtata dutiksaik.

Juju códigonum chicham umiaku kuchanmaya namak mautaig nunú waji ainawai tusa tibau aigkish batsatkamu chichama umiak ashi waji aina duka iik takaschami namak kuchanmaya maakuish tusa takushkam dutikmainai.

Art. 104.- Umukai aidau

Umukaik, pampa, duwe yapaku chigki aidau yutaiji, untsu yumi pukuni jinin yapaaku aina duka kuntin aidaun umutai Awajuni nugken ayá nunuwai.

Art. 105.- Batsatkamunmaya nugken umukai batsata nunú kuitabau

Batsatkamunmaya aidauk umukainak puyatjus kuitamin atatui, chigki aidaush, kuntin aidaushkam nuna kautuidau asamtai kakajus egaka maá yumain asamtai.

Art. 106.- Sujimkamu

Sujimkamu atin:

- a) Umukai ayaunum aja takaschatin
- b) Kuntinu umukaiji tikiju makichik kilómetro tumain aigkik ajakesh, jetenkakesh takamainchau.
- c) Chigki umukaiji tikiju makichik kilómetro tumain aigkik ajakesh, jetenkakesh takamainchau.

CAPITULO V

NUGKA AKANJA TAKAT

Art. 107.- Juna taku tawai

Juju códigonum, nugka akanja takat tawa tawa nunak, nungka wainka pachimka takasa wetsuk shiig diisa tuwig ajakmamainita, tuwig egamkaish yutai awa, tuwi ima senchish kuntinush ayawa, nunú wegaja nú akaantuja díita nuna taku tawai.

Art. 108.- Nunú anentaiyaik akasmatbau

Yaunchkesh initaik muun aidaush nugka akanag takainak ikamnash nuiya juukmaka atsumaku umijmamtai asamtai shiig kuitamas taká ajaku ainawai, nudiau asamtai duke yabaish nemagdawai, jutik takaku tajimat pujú wajakbau asamtai.

Art. 109.- Nugkash wajuk akanjamu atinaita

Jutika nugka akanja takatai atatui:

1. Nugka, kakajus wekaetushtai
2. Nugka, ii waintsa wekaetutai, nuniachkush anentai ichichiaku ayamtai aina nunú.
3. Nugka, atsumamu aidau juaku wekaetutai, nunui wekaesa ikamash wajig ayawa nunú unuimatai, nuigtush wajig ayawa nunú augtutai aina nunú.
4. Nugka, tajimat pujustasa batsamsa takatai aina nunú.
5. Nugka namaka anunjua weaju aina nunú.
6. Namak, entsa wegaja nunú, nuigtush, kuna dukuji batsatkamu aina nunú.

Art. 110.- Nungka kakajus wekaetushtai

Nugka aents batsatbaun ukuki atushat aina duka kakajuts takashtai ainawai. Duka muja aina nunuwai, nuniachkush, kucha muun tepaju

achu aitai aina nunuwai. Duka nugkak wekaetushtaiyai, nuigtush ajantukbau ainawai nui muja wakani batsatui, tijae pujawai tutai asamtai. Nunú nugka tepaja nui kuntinchakam, yujagshakam ayawai. Nui wainka takakbaikish yumpunmainai numi ajatam, nunitai kuntinush pisamainai. Nunú nugka aidauk antigchamu atinai, untsu nugka augtin aidau nuna augtuinak wekaemain ainawai. Nunú nugkanmak yaaktamainchau tikich anetskesh nunú nugkanmak takaschatin. Muja tepaju wegaja duka tikish umá aina nujaish dita nugkejai intanimtiktai ainawai. Nunú nugkak akasmatkamu asamtai utushtai ainawai, untsu, nunuish wajiig ayawa tusa autustasa wayakuish waimainai. Nunú nugka aina nunú waitkakuik utugchat igkumain asamtai titulókesh awagtsuk agkan idaisamu ainawai.

Art. 111.- Nugka, ii waintsa wekaetutai, nuniachkush anentai ichichiaku ayamtai aina nunú.

Juka nugka wekaetushtaiya nuna wakentin wegaja nunuwai, nuig, batsamtukchamui. Juka ikam kanaku yujagtai aina nunuwai, yaunchkesh waimaktasa nain ayamku yujaju wajakbau aina nunuwai. Jujuwai dekas muun ikam tepaju asamtai ajantusa diitai aina duka kuntuin kauttaiji amutkaig tusa. Jujú nugka tepaja nuig ajakmaikish emashtaya, atsumaku ii diisa wekaetutia.

Art. 112.- Nugka, atsumamu aidau juaku wekaetutai, nunui wekaesa ikamash wajig ayawa nunú unuimatai, nuigtush wajig ayawa nunú augtutai aina nunú.

Juju nugkanmak, atsumaku takatai aidau numi kuashat ayawai. Nunú nugkak muun tesaamu, nunú nugkanum anenjaush takatai, tujash tikima amukchatin. Nunú nugkak, tikich nugka tesaamu, tajimat pujustasa takatai, tuja tikich tesaamu ii atsumamu dutikatasa wekaetai, wakannumkesh ichishmamjatasa wekaetai aina nujai apaniajui. Nunú nugkanmaya juki takasa pujutai ainawai, tujash bakichik, nuniachkush kampfatum tsawan wekaesa jegatai ainawai nunú nugkanum. Nunú nugkanmak jetenak aidau ayawai, aents dita atsumamujin egainak yujatai asamtai. Nunú nugkak yujag juuka yutai, kuntuin mautai, namak mautai, kanaku yuatin ajakmatai, ainawai: jintindaibau, ampimat, jega jagamat, namaka wekaetai, wasugkabau, waji takatai, muun takajakbau aidau unuimamu ayawai. Nunú nugkanum ayawai numi pegkeg, numichu tikich waji aidaushkam atsumaku takatai sujutai aidau ayawai. Nunú nugkak asauk aidau, initaik muun ajakmakbau, ajak aidau ayau, tikich yantamnum takainak nugka ayamjati tusa ukukbau ainawai. Aents namaka nujinchi weaja nuwi etsa minitaijiya aatu yatam batsamin aidauk dutika takasa

pujutan unuimatjau ainawai. Jata ishamain minitaik nuwi shiyakag ayamjubau ainawai. linia pujutnumak uchi: tsakatuch, datsa, nuwauch aidaush nuwi unuimainawai dita takasag batsamsatnun.

Art. 113.- Nugka, tajimat pujustasa batsamsa takatai aina nunú.

Juju nugkak aentsti ijunja batsamtai aina nunuwai. Nuwi batsamas dita yuawagtinun ajaka ajakmainak, dita yuatnun namaka mainak, batsamin aina nunuwai. Nuwiyen numi aidaunash takainak, kuntinun egamak yuinak sujupainawai. Nunu nugkak pegkeg ajak ajakmatai, tagku kuitamtai ainawai. Nuwi ayawai, batsatkamu aidau, nuwi takau aidau, apu aidau, kanu anumtai, aviogka iyautai aidau, waji sujutai aidau, waji najantai aidau, ashi nuwi ayawai. Nuwi batsamsa takainaku, nugkash chichamjuinaku, tajimat pujut chichamjuinaku batsamtai aina nuna tawai.

Art. 114.- Nugka namaka anunjua weaju aina nunú.

Juju nugka aidauk tikich nugka takatai aina nuni yaig ainawai. Juju nugka aidaushkam atsumaku takatai aidau kaushat ayawai. Juju nugkaknmak, takashtai tuke najaneaku aidau, nujagke ututai, kucha amutin aidau, ajuntai aidau, weaju ainawai. Nunú nugkanmak, kuashat tsawan ajakma pujushtai, ayatak: duse, ajus, shaa, biik, sandía, ajakmatai ainawai, tujash kashi kashinig yuwa pujutai aina dushakam: paampa, aina dushakam ajakmatai ainawai. Nunú nugkak kaya kayamjumtau ajak shiig tsapau asamtai, waamak juuka yutai aidau ajakmatai ainawai. Juka namak muun aidaunum amatjau ainawai, nuwi yujawai, chajap. Iwan, yantana, ugkubiu aidau batsamin ainawai. Dushakam namaka pakaji weaju asa, nunú tsuwapamak nujag piyujak aents aidaun waitkamain asamtai, puyuatjusa kuitamtai ainawai.

Art. 115.- Namak, entsa wegaja nunú, nuigtush, kuna dukuji batsatkamu aina nunú.

Juka namak, entsa aina nuna pachis tawai, yumi pegkeg umutai, ashi nuwiya aents aidau takatai aina nunuwai, nuigtushkam nui namak maa yutai aina dusha ayawai, antsag, namaka kunaji dukuji beseja ipamin tutai aina dusha ayawai.

**TITULO III
IINU ASAMTAI UYUMAT ANEAKAS TAKASTIN**

CAPITULO I IINU

Art. 116.- Juna etsejak tawai

linu tawa duka bakichik wajikesh baki bakichkitinu daajin, nuniachkush kawemti daajin ajutkagtau asamtai atsumakuish takatai aina nuna, tuja antsag iinu asamtai chichamjutai aina nuna tawai. Wajik midauwai tau asa ii wakegamu dutiknashtatui, juka, ijutkamujaiish waji akasmatku maani pujuta duchauwai, nuniau asamtai, Perú Constituciónji, GTAA estatutoji, Batsatkamu estatutoji, tuja jujú awajuni Códigoji wajintu chicham umikbau ainawa nujai betek aintsa ematai atatui.

Art. 117.- Awajun aidau wajiji

Awajunti nugkega duka baki bakichik batsatkamu aina nú adaiku comunidades nativas tabau awa nuna daajin jukimui, nuigtushkam, nugka agkan jugaja dushakam iina apachji yaunchuk nagkamsash batsamas nui egamá wajukú asamtai jusha iinuke tusa égkea jukimui, dutikaku yabaiya duish imatiksaik akasmatka kuitamtaiyai nui tajiasa batsatbau asamtai. Batsatkamu nugke nunú, tuja, agkan nugka tepaju akushkam nui egamka yutai aina nujai ijumja sujimkamui tsuwapakbau ahati tusa.

Art. 118.- Batsatkamu nugke

Jujú ainawai batsatkamu wajiji aina duka:

- a) Batsatkamu daajin nugka jukimua nú.
- b) Ikamia egamka juukmaka ayamjumasa batsamtai aina nunú.
- c) Wajii batsatkamu daajin sumakbau aina nunú, nuniachkush, anenjai sukagtusbau aina nunú.

Art. 119.- Baki bakichkiti wajiji aina nú.

Baki bakichkiti ainag nuna wajijig jujú ainawai:

- a) Aja aidau
- b) Jega aidau
- c) Numi pegkeg takatai, takashtai nii ajakmakbau aidau
- d) Baki bakichik takasa paan iwainaka sumakbau aina nunú
- e) Tagku aidau
- f) Batsatkamunmaya diis juka niinu atí tujutmatai jukimu aina nú

g) Ashi wajii iinu asamtai takatai aina nú

Art. 120.- Batsatkamu wajiji aina nunú takamu

Batsatkamu aentsji aina duka, ayamjusa chichamjam atatui, ditash batsatkamu nugkega nunak betek ijunas nugka tesajuamunum ajajin takainak, tagkujinash kuitamkatnume tusa. Tuja ántsag ayamjusa chichamjam atatui ikamia baki bakichkiti atsumaku egamka yutaiya dusha sujitdaikachu amí tusa, wajintu jujú código chichawa nunú diisa.

Art. 121.- Juju umiktin

Atsumaku juukmaka ikamia takatai aina nunú juki sujukttag tabau ataik, batsatkamua nunú, tuja yaki tikish apu junin diin ata tusa atakamuita takat nujai aimku ayu tibaunum takatai atatui.

Art. 122.- Tsawanji nagkaematkishtin

Makichik antsu wajijigkesh megkaekau tikich aentsui au wantinkamtaig, kuashta tsawan nagkaemakiu ataishkam chichamjuk tuke awagkiu atin. Nunú aents niinuchu aig tuke aneas sujimakug chicham umiktin agagbau Código Justicia Awajun tutai umikbau wajintua dutiksag suwimkan juktittawai.

Numikesh, tikish ajak aina dukesh ajakmamu aidauk yaki ajakmawami nudauke, kuashat tsawan idaisamu akushkam. Nii ajakmawa duke takakush takastatui.

CAPITULO II

UYUMAT ANEAKAS TAKAMU

Art. 123.- Juna jintiak tawai

Ikamia juukmaka atsumaku umijmamtai aina nuna pachis, juka awajuni nugken au asamtai nuna aentsji aidauti atsumaku takau ainasjik yabaish nunisag atatui tusa etsejui. Juukmaka atsumaku umijmamtai aina duka, nugka aina nunuwai, yumi aina nunuwai, kuntin aina nunuwai, ikam aina nunuwai. Jui wayawai, muja, tuna, ayamtai, wakannum ichichmamjatasa yujagtai aina nunú.

Art. 124.- Batsatkamu nugke aina nuwi takainamu

Nugka jega jegamka pujustin, ajak ajakmatai, tagku kuitamtai, namak tsakapatai aina nunú, batsatkamunmaya asa nugka sukagtusbaunum takainaku batsamna nuna jintiak tawai.

Art. 125.- Wega nugka aidaunum dutikmain

Aents batsatkamunmaya aina duka wega nugka aidaunum wayash jukmamainai nii atsumamuji umijmamkatatus, tujash nii wakegamu juwak amumamaina nuwi jegatsuk, jujú código wajintu chichawa nuna diis juukmau atatui.

Art. 126.- Wajupa tsawan takamain

Nii jaak, nuniachkush nii tikich batsatkamunum wegatsuak nuniak nugkenak ukuktatui. Aents jiina duka nugkanash yanak ukujua nuna paan etsejuk jiinkiu atatui. Yaki jimag mijan wantintsuk, nuniachkush, etsegtumatsuk ayatak jiinki wekaewa nunuka nugken megkaewai.

TITULO IV BATSATKAMUNUM PUJUT

CAPITULO I BATSATKAMUNUM PUJUTAK JUJUWAI

Art. 127.- Asum anentaiyai batsamsatag tabaunum

Etsa, Bikut, aidau pujuta pachis jintiawajua nunú, nuigtu muun chichagkagtukbau aina nunú tuke ujanitai atatui ásum anentaiyai batsamsami tabaunum.

Art. 128.- Jega batsaka jegamjatin

Baki Bakichik batsatkamu nugka diisag, dita wajuk yaaktamsa nugka pujustina nunú tinamdaeja agkan maanitsuk shiig batsamsami tuinawaki dutika batsamsaagtatui.

Art. 129.- Kuchijá

Baki bakichkik batsatkamu aentsji aina duka kuchijajinak umika jegagkamu aagtatui. Nuna umiachuk suwimka juwak makichik tsawan batsatkamunun takagsattawai.

Art. 130.- Kuntin tagkubau

Baki bakichik batsatkamu aentsji, niina nuwe uchiji aidaujai ijunas pujustin nugke tesajuamunum jegamak puja nuwi niina tagkujin atash, pavo, nuigtu tikich aidaun tagkumattawai.

Art. 131.- Peegmamu

Maki makichik batsatkamu aentsji aina nú niina nugken jega jegamak puja nuna agajinak shiig ipantug peegtug kuitamin atatui. Yajaig ijusa pujamu awa nunú chichaman umikag nugka tesamua duka jimagtuka peegmi kuitamkami tuinakug dutikmain ainawai.

Art. 132.- Tsuwatchaunum pujut

Baki bakichik muun aidauk, dita nugke jega jegamkamua nunak, Bikut wajuk jega tsuwamja pujutan jitiauwaita imatiksag umika batsamsaagtatui.

Art. 133.- Jinta aidau

Batsatkamunum jinta aina duka ashi aents aidau yujatai asamtai, ijuntuja shiig ipanja tsuwat atsau kuitamtai atatui, Bikut chichak wajintiuwaita nunú antugka.

Art. 134.- Batsatkamu agaáji

Batsatkamu najanamua duka ashi ijuntuja takasa iwajumu pegkeg atatui, tuja junak diin atatui muunjima diistin adaijamu aina nunú, antsag atuekaagtatui Saludnum, Educacionnum, iglesianum takau aina nujai. Baki bakichik batsatkamunun diin atatui shiig ipanmamjampash puja tusa GTAA daajin ame tsuwak chichamjin ata tusa adaikamua nú. Batsatkamua nú betek umikchamtaig iwajata tusa tsawan apustubau atatui dui patasaik ijagsatin asa dekas umikeash tusa.

Art. 135.- Tsawan uchi jiinki wekaemainji

Uchi 18 mijan ajachbau aidauk kashi 7:00 pm nagkamas dita jeen batsamsaagtatui, untsu waugsa atsumamu abaunum jiina duka utugchat atsawai, antsag apajijaigkesh, dukujijaigkesh wekaga dushakam utugchat atsawai. Mijan 18 ajamun ejetsuk yumainun egámak jiinki wekaga nuna tatsui.

Art. 136.- Umamu tsawan aputusbau

Lunestin nagkamas tumigkua dui umumaina duka tsawan ujaimui 10:00 pm epentai ati tusa. Uchi tsakata duka uwaja nampetai aina duka suwamuk achattawai. Umutai aina nuig senchi ishinka antutaig achattawai.

Art.137.- kapaina dukesh, umutai aina dukesh apugbau

Umutai aina duka batsatkamu tugkitkajin apugtai atatui. Kapain aina nunú sujakuik jegá nagkamas dakapa 50 metros tupaja pujusa sujutai atatui.

Art. 138.- Iwishin

Iwishnuk wantinag tsuwajatin atatui ijunja papii najatuamunum. Dutik wantinkachua duka waitjawai tabau atatui. Tunchikesh, iwishnukesh wawejata duka batsatkamunum puja nunú jiyam atatui.

Art. 139.- Waji sujutai aidau

Ashi waji sujutai aidauk shiig dekaamu, batsatkamunmaya Pamuk papii najatua susamu atatui. Nunú papiik baki bakichik mijantin yamajimtiktai atatui 30 soles akikmaku. Papii jutsuk, nuniachkush ataktu najatua susachbau pujus waji sujakug 100 soles akikmaktatui.

Art.140.- Ipattai najanamu

Patak magkagtumain aina nunú najána kuntin maatasa dakamtika ukutai aina duka makichkish dutikashtin.

Art. 141.- Yutai aidau akike

Ajak aidau, yujag aidau, kuntu neje, yuwa ichishmamja pujustin jukimu aidau akikeg batsatkamu aentsji aidau ijunag umikagtata nunú atatui.

Art. 142.- Tagku takakbau

Kuntu tagkumuk, tagkugtina nunú ayujak, shiig kuitamak apusattawai. Tagkuk makichkish watkamait sui, tagku waitkauk suwimka juwak epeknun egkemattawai. Tagku takamsamtaig, esajattanakesh esajatmataig, tagkugtin iwajattwai.

CAPITULO II

BATSAMSATNANU IWAGBAU

Art. 143.- Ijuntuja takat

1. Aents aidauk dita takatjinak ipaamagkesh takamain ainawai. Nuna dutiktai wagka aikame tusa tumainuk atsawai. Tujash takat pegkegchau utugchatan initkagtumain, aina nuninnak takanchastin.
2. Ijuntuja takatak tuke idaimatsui. Ijuntuja takamain batsatkamunum ayaig intimki etsegtsuk wekagak yaijattsu duka suwimak susamu atatui.
3. Ijuntuja takatak juju ainawai:
 - a) Batsatkamu agaji takamu
 - b) Takat chichamjuka ijuntuja takamu

Art. 144.- Comunidadnumia aidau takatji

Baki bakichik batsatkamu aidau ajiaagtatui policíaji, utugchat batsatkamunum pachimdayamukesh ai tusa, jujú aina duka dita nugkuja takataiji umigkamu asag nuna nugkuja yujattawai.

Art. 145.- Yana antujin atatus policiash

Batsatkamu policía ainawai batsatkamu aidaun kuitamkagtin, dita aidauk, batsatkamu Pamukjin sumitkau ainawai, nuniak umin ainawa ijunja chicham jintiamu aina nunashkam.

Art. 146.- Tsuwat aidau

Baki bakichik batsatkamu diisaagtatui wajuk ajapen agtatua tsuwat minaja utsanin aina nunash, nunisag waji minaja ajapnachu aidaunashkam wajuk utsankatig tusa jintiau aagtatui nugka tsuwapagamtai jata jiintugmaki tabau asamtai.

Baki bakichik batsatkamu aidau, nuwi apu aidau, ashi aents aidaujai ijunag chichasag jintan pegkeja iwajug, batsatkamu agajinash imatiksag tsuwamag batsamin aagtatui.

CAPITULO III

AJA TAKAT

Art. 147.- Wajuk takataimpaita

Ajakmata nunú pachisa chichamjakuik, wajintu jintiawaita Nugkui, wajintu iina muunjish jintiauwaita nunú diisa takatai atatui.

Art. 148.- Kuashat ajak ajakmamu

Kuashat ajak pachimja ajakmaka emaku ajak uyugbauk shiig pegkejai nuwiya yuwa pujutai asamtai, nunin asamtai, kuashat ajakjintin aidauk sujitdaitasuk iinia pujutnum wajuk yapajiasa sudaitai ainawa dutiksag sudaimain ainawai, aatus awajun aidau tajimat jamamtuch batsamsamu amí tabaunum.

Art. 149.- Ajagtin amain

Baki bakichjik muun aidauk jujú ajumain ainawai:

- a) Bakichik aja mama ajatai
- b) Bakichik paampa aja
- c) Bakichik aja shaa ajatai
- d) Bakichik aja ajus ajatai
- e) Bakichik aja ashi daimja ajatai.

Juju aja aina nuwishkam tsuwamatai ajak aidau, yujag aidau, achu, kugkuk, uyai aina dusha ajakmamain nunú yusa pujumain asamtai.

Art. 150.- Yainitai

Baki bakichik muun aidau aja takastatakug yapajiasa yainika takatainak dutiksag yainikag takatai atatui.

Art. 151.- Pujut, takat aina nunú jintindaibau

Muun uchijin wajuk jintintujaku ainawa duka idaimainchau, aatus jintintak uchijin shiig anentaimkau atan unuinajuku ainawai, nunin asamtai dutiksaik uchi aidau jintintai atin.

CAPITULO IV JEENTIN AMAIN

Art. 152.- Batsamsatasa tabaunum atsumamu

Jeentin atanak ashi aents aidau atsumawai, nunin asamtai baki bakichik yaunchuk muun takajaku aina dutiksag, jega jegamkuish yainika jegamka batsamtai atatui.

Art. 153.- Batsatkamunmayatik ashi jeentin amain

Ashi jeentin ami tusa batsatkamunmayatik chichamjumamin atatji. Ashi muun aidauk jeentin atatui, jeenchauk atsuttawai.

TITULO V PATA WEGAMU

CAPITULO I NEMAJDAIYAMU

Art. 154.- Juna taku tawai

Aishmagti nuwajai tsanigka nuwena pujuta nuna taku tawai. Nuwena tajimat pujuta nunú ainjamu atatui.

Art. 155.- Nuwenbau

Aentsuk nuwenashti tusa sujitamak amaitsui, dita nuwentainak dutiksag nuwena niish nuwentin wajas uchin akia yujamainai.

Batsatkamu muunji aina dushakam nuwegkagtumain ainawai juna pachis Codigo Civilnum wajintu chicham umikbauwaita nunu diisa. Nunak Pamuku apujimsag nuwenainak, papii batsatkamunmaya nuwenku agatainum agatmamjaagtatui.

Art. 156.- Nuwenati tumainchau,

Nuwenbauk datsa 18 mijan nuniachkush nuna nagkaesaukesh mijan ajamu nuwajai chichasag, ashi chichasbaunum nuwentai atatui. Unuimatdaikamushkam atsaig uchi nuweatag tubauchui, nuwaush akuishkam, aishjinata tusa waitkamuk atsuttawai, juju nuwakesh, aishmagkesh dakitamu aig waitka duka suwimkan jukittawai.

Nuwentanmak juju umimain ainawai:

- a. Chicham umikchamu aig waugtuka nuwentak, idaimainai, awajun nuwa aidauk aentsun shiig diis aishinai atinme tusa jintinmainai.
- b. Aishmag nuwetatakug, nuwashkam aishinatakug tuwi dita pujustaj tuinawa nuwi dita pujutjin iwainmamkau amain ainawai. Uchi tikich batsatkamunmayagkesh nuwenatag takug niina batsatkamu Pamukjiya nunú papii constancia najatua susamu atatui. Nuwenawagtin aidau dita pujutji pachisa agagbau aidaun, juka takamchau, utugchatash atsugnai tusa papii umikbau susamu amainai. Tuja nuigtushkam jata ishamain tsagaustai tumainuk atsujui tusa papii ampijatun susamu atatui.
- c. Aents tikich nugkanmaya awajunchaukesh takat pegkegchau aina nuninun takau wekagas nuwenatjai takuish nuwemainchau, nuwashkam aishinmainchau.
- d. Mai papii aujnukek nuwenmain ainatsui, antsag uchi jintinnuk niina jintintaijinak nuwatmaitsui.
- e. Chichaman umik nuwenami tusa batsata duka, nuna ukusagkek tikishkjaig nuwenashtatui.
- f. Uchi tsakat aidauk juju asamtai tajai tusaik makichkish nuwenatnume tichatin.
- g. Batsatkamunum nuwembauk municipalidadnum nuwenaina nujai betek atatui, aatus tau asamtaiCodigo Civil, artículo 262.

Juju papii umikmawa juna umiachhunak comunidanumia Pamuk nuna umiachush itugkami timawaita nuna umiktatui.

Art. 157.- Iyash tupandaibau

Iyash tupandaibauk, batsatkamu ijunag nuwenaukesh, nuniachkush dita muunji nuwentan nuwenawajush ajapdayami taji tusag kanaka batsata nunu taji. Nunik batsamas 3 nantu nagkaemakmataig, apu aents aidau chichame epegtinun aishmagkesh, nuwakesh jegajua yamaik idajai tumainai.

Art. 158.- Ataktu wakitkishtin idainayamu

Ajapdaiji tusa batsamas kampatum nantu ejeyag dekaskenum ataktu wakitki pujumainchau dekapenakug, batsatkamu Pamukji ijunja chichataijin ijunag chicham umikbaunum idaidaitai atatui. Untsu aishmagkesh, nuwakesh, wika idaimatsujai tutaik batsatkamu Juez diisa wajuk inagnamainkita nuna dutikattawai.

Atakesh wakitkishtin idaidayamuk mai tupandayinak agkan jugaina nunuwai.

Art. 159.- Wagka idaidaimainaita

Jujú utugchatnum idaidaimain ainawai:

1. Ikagdaikamunum
2. Kuashat suwimkugkesh, jiyakugkesh waitká pujujam idaidaimainai, jintiinush diis emamunum aniau asamtai.
3. Suwimkugkesh maumain awaju pujujam idaidaimain.
4. Utugchat atsaig ukukim pujus kampatun nantukesh wegak idaidaimain.
5. Nuwena pujus jata ishamainun utsukam.
6. Iyashin tupandayag kampatum nantu makichkish adigdaitasuk pujak.
7. Aneenisa pujumainchau utsugchat atai idaidaimain.

Art. 160.- Nuwa ayamjamu

Nuwa waitkam pujutai, batsatkamunmaya pamuk ayamjuktatui, dutikamtai, batsatkamunum chicham epegtai wajintu umikbauwaita nuna suwimkan jukittawai nuwan waitka duka. Pamukuk chicham segai policia batsatuk ayamjak kuitamkau atatui nuwa utugchatnum pujus waitkam awa nuna.

Art. 161.- Aishmag nuwajai ukunikchamu amain

Awajun tuke batsamin aidaunmak dushikdaibau, kajegdaibau, aentschau niinitai aina nuninuk idaiku aishmagkush nuwashkam betek eme anendaisa chichasa pujutai atina nunú emkati tusa chichamjutai atin. Batsatkamu aidauk juju anertainak ashi betek umimain ainawai. Aatus asamtai Awajun nugkanmak aishmagkush, nuwashkam eme anendaiyas maanitsuk, kajegdaitasuk, batsamtan puyatjuktinme.

Art. 162. – Anentai sudaibau, jintindaibau, unuimamu.

Aents aidau tajimat pujuta unuimagtinme tusa batsatkamu aidau, unuimatai aidau, tikich nuninun takau aidaujai atunika anentai sudaibau, jintindaibau atatui. Aatsa takaku kajegdaitasuk, eme anendaisa nuwentin aidaush, nuwa aishintin aidaush batsamtin unuimamu atin. Dutikaku nuigtushkam nuwa ayamke pachisa ujaniamush amain.

Art. 163.- Nuwa dakitaig sujukbau aidau yayamu:

Nuwa dakitaig waitkasa sujukbau aidau, nuwa waitkamaitak pujaushkam, dutikamu aidaun ayamjuktin Perúnum nuninun diin aina nujai atunitka chichamjamu atin. Dutikaku, jamantuchu pujuta chichamjin aidaujai, muun pujuta niimatjau aidaua, nuwa muun aidaujai takantsatawai, idaidayakush utugchat atsaunum shiig agkan juakti tusa. Nuwa aidau waitkamaitak batsatuk anmainchaun aniawai tusa chicham patatmak amainchau, kajejamkesh amainchau.

Art. 164.- Waitkasa sujukbau aidau idainayamu:

Nuwa waitkasa sujukbau aidau shiig pujachak niina aishi suwimkugkesh waitkam idaidaisatjai takuig nunikaipa tusa tumainchau ayatk yaimain. Idaidaisatjai takug nuwakesh papiin awaimainai, nuniackush niina patayigkesh papiin najana batsatkamu chichama epegkin aidauwai, nii tuwi awayatag tawa nui dutikmainai, dutikamtai nunú Pamuk chichama epegkin, shiig diisa, nuwan waitkasainum tusa, uchigtin ataik uchishkam waitsainum tusa diyaku atatui.

Art. 165.- Waitkasa sujukbau aidau yupichu idaidaimain:

Nuwa dakitaig waitkasa sujukbau pujumainchau dekapeak agkanmaga shiig pujustatus idaidaisatjai takuig utugchat apujtusa waitkamak achatin, waamak antujam atatui. Nuna chichamjin aidaushkam nunín utugchat ataik, tsawanta uwagá batsamtsuk, shiig diisag waamak chichama iwajin atinme tusa chichamjuktin.

Art. 166. – Nuwa idaidaisau niina uchiji aidaujai kuitabau:

Nuwa aishin idaisatjai tusa chichama egkea idaisamtaig, utugchat amain waitkuik waamak chicham umika niina uchiji aidaujaí kuitamnaktin.

Kuitamkuik juju dutikmainai:

- a. Muun pujutan niimatjau aidau, nuwa idaidaisash wajuk pujustatua nuna pachis chichagkagtin.

- b. Nuwanak niina uchiji aidaujai ijumag anentain ichishtujagtin nuna nii atsumtaik.
- c. Makichkish waitkasainum tusa shiig kuitamkamu atatui.
- d. Idaidayas pujusmataishkam ayatak diisa idaitsuk jeenchau wekagas waitsai, yutainmashkam waittsai tusa nunú batsatkamunmaya aidau chichamjukaagtatui.

Art. 167.- Uchigtin umimain

Apagtin aina duka uchiji ichichmamag pujustina nuna tuke susau atatui. Niinu wajig awa nuna diis uchiji aidaunak yutain, papiin augbaun, uchiji shiig anentaimkau tsakagtinme tusa diyaku atatui.

Art. 168.- Pataa weantu, pataayai tutai aidau

Numpanum pataya duka, nunú numpanmayag akiiatkamunum yujakbauwa nunuwai. Juka ama tijajiya imanui achiawai.

Juka nuwenbaunum nuwa patayi, asihmagku patayijai makichik pataya nunin wega nunuwai.

Art. 169.- Uchijimamu

Tikich uchi juki uchijimawa duka tuke pataa wegaku nuninui.

Art. 170.- Nuwa anagmat

Dui nuwenamig tusa nuwa sumakuik apajijaish, dukujijaish chichasa anagmatai atatui. Aishmagshakam, nuwashkam wainak wekaetsuk initikish anajmatdayaish wajuk pujusbauwaita imatiksag kuitamdaikaagtatui.

Art. 171.- Nuwenami tusa anajmamunum tupandayamu akui dutikmain

Nuwenawagtatus chichasbau aig, aishmagkesh, nuwakesh dakitug tupaakug, wainak waitkakagtau asa, nuigtush nigki tupau asa akiku atatui tsanugbauwa nuna. Jujú nuniamu ataik chicham egketam atatui pamukui. Nunia duka akikmaku atatui 3000.00 soles.

Art. 172.- Ikagdaikamunum akiniktin

Ikagdaikamunmak jutika iwagtai atalui:

- a) Aishmag ikagmaku akikmaktatui 1,500.00 soles, tuja nuwashkam akikmaktatui 1,500.00 soles ikagmaku asa.
- b) Epeknum 20 tsawan ekemattawai, tuja nuigtushkam Pamuk suwimkan susattawai batsatkamu takatji tu ainawa nuna diis.

Art. 173.- Relación extramatrimonial:

Mai muun waigkú aina nunú tsanigka nuninamu ataish dita apaji aida duka, dita patayi aina duka wagka juninawa tusa ataig chichakchattawai, dita anina nunú chichama apugtsaigkik, untsu, tuke aan akinau asa jamantin aina nujai nuniamu atai apagtin aina nú, pataintin aina nú chichamjukaagtatui Jintiinu/Pamuku emtin chichama egketua.

Art. 174.- Nuwenatag tau idaimitkamu

Nuwenatnume tusa chicham umikbau, dita nuwenawagtin tsawan jegau aig, nuwakesh, aishmagkesh dakitakug, nuna anentaimtikak waitkau asa, akiktatui, s/3000.00 nuevos soles. Untsu dakitjamkesh jakamtaig nii nunitin utugchat jegau asamtai, **1 UIT akikmaktatui.** Bakichik uchikesh, nuwauchikesh 18 mijan ajamu asa, nuwenami tusa tuinaig sujimam jakamtaig, yana utugchatjinia jakae nunikmataig niinu utugchat ajittawai, apajigkesh, nuniachkush niina patayigkesh.

Art. 175.- Nuwena akiamu uchi aidau ayamke

Nuwentin aidauk dita uchijinak jimagtuk yaigkaagtatui, dutikainak jintintua unuinainak kuitamkaagtatui.

Art. 176.- Nuwentin aidau kuitamdaimain

Nuwentin aidauk yaininak mai umigdayas batsamin aagtatui.

Art. 177.- Nuwena pujamua nuna muunji

Nuwena pujamua nuna muunjig aishmagkui. Tujash aishmag niina nuwejai mai takainak Tajimat aagtatui.

Art. 178.- nuwenawajun wajiji aidau

Nuwena pujusa waji ikamkamu aidauk ima aishmagdaukechui mai ditanu ainawai. Nuwiya nuwakesh, aishmagkesh jakamtaig waji aidauk iwaku juga nudau aagtatui. Yaunchuk muun dita wajuk nuwenin ainawa dutikas nuwedau aina dushakam wantinag papiinum nuwena batsata nunú wajuk waji jugatbau atatua nunisagke.

Art. 179.- Muun jaakush wajuk tinamkagtú ajakuita niina wajijinash

Waji jaka ukuamuk jutik tinamkagtutai atatui:

- a) Nugka niina takataiji, ajaji aidau, niina jeeshkam waje juga nudau aagtatui.
- b) Apajigkesh, dukujigkesh jakamtaish uchijish, nawanjish tú wajinak jú ajakuita yabaikish nunisag atatui.
- c) Apaji, dukuji mai jakamunmag waji bitaikamea juga nunak uchi bitaik jugaina nudauwai, tikichik atankichaagtatui.
- d) Waje jugaka duka nuwenkush, aishjinkush niina uchijin nugkanak tesajua susattawai sujittsuk, dutikak nii pujus takastinjinashkam jukittawai.
- e) Aishigkesh, nuniachkush nuwegkesh jakamtai iwaku puja duka niina jeenig pujustatui.
- f) Ashigkesh, nuwegkesh jakamtai iwaku pujau niishkam jakamtaig, niina uchiji aidaunum jegak juaktatui, muun wajuk batsamajaku ainawa dutiksag.
- g) Aents wajejai juga duka nii wayá pujus tuna sumake duke atatui niina wajijig.

CAPITULO II UCHIJUI

Art. 180.- Uchigtin aidau uchi piipichin kuitamtin

Uchi piipich aidau ayamke:

- a) Uchigtin aidauk, uchijima tsakapaushkam kuitamak tsakapak papii augmkitkastin, jataish kuitamkatin uchi pegkeg batsamas tsakagtinme tusa diyaku atatui.
- b) Nuwa muntsugtaitak ejapjuka duka pamukui chichama egkea yajai pujus ejapjukuita nuna uchi kuitamkau ata tusa titatui.
- c) Ejapmitkakiatak mina uchigchawai takug uchi akiinamtai niime diisa niinui tama atatatui, nuna dakitakug ADN, jiiki ejemainai, dutikachkug niina uchijigke tama atatui.

Art. 181.- Tikich uchi juki uchijibau

Bakichik muun nii diis tikich uchin wi juki uchimatjai takug dutikmainai. Uchi uchimatag takug batsatkamunmaya Pamuk iijunja chichataijin ijunag umiktatui. Uchi juki uchimatag tau chicham umiaku papii najanamun juki Jintiinu ejetuam nii nuna ashi diis papii najana susattawai yaki sumawa nuna ame uchijum yabaik wegawai tusa.

Art. 182.- Nii akiamui tutai

Nuwenawag pujus uchi akiamua duka, nuniachkush ajapdayawag 9 nantu wegamunum uchi akiinamtaig duka niina uchiji atatui. Untsu nii utujimkug ADN jiiki iwaiknakti.

Art. 183.- Mina uchigchawai takui

Uchi akiinamtai nuwentin chichaak, juka mina uchigchawai takug batsatkamu Jintiinjijin chichaman egkeak juka mina uchigchawai titatui nii tawa nuna iwainamaina dusha ajamu asa. Tuja nuna takush ayatak chichabaik ejemainchau aig takug jujú papii umikbaunum articulo 184 wajintua nuna umiktatui.

Art. 184.- Uchi aidaun ayamke

Uchi aidauk dita apajin batsamas aentsmagak 18 mijan jegaagtatui. Jujú ainawai dita ayamkeg:

- a) Yutai diyaku suwamu atin
- b) Papiin augmikasagtin
- c) Aneasa kuitamam agtin
- d) Yaunchuk unuima wajakbauwa imanisag jintintam agtin.
- e) Yaunchuk yachame wajakbauwa nunú jintintam agtin
- f) Initikish wajuk batsamsaya mininua nunú dekamtikamu agtin.
- g) Wasugkamainak shiig aneas aentsmagau agtin.
- h) Pegkeg pujut pachisa chichagbau
- i) Uchi papiin eemjuk aujak wainak wekaetsuk nii augbaujin iwainmamtaik niina apaji yaigtatui papii ashimkati tusa.
- j) Uchi tsakataitak eke 18 mijan ejetsuk nuwenuk apaji susam yuwa pujujakbaujinak idaisattawai, nuniak nii takas pujustatui.
- k) Uchik ashi nii tuna atsumawa pegkeg pujustatus nuna niina apaji umigtai atatui.

Art. 185.- Uchijui aidau kuitamat

Muun uchigtin aidauk dita uchijinak jegá ima niinakek idaimaitsui, tuja tikichi jeenigkish wemataish kajimatig idaimaitsui, dutiktsuk dekas uchi intimkiu ai takug chichajuk tsakapamainai.

Muun niina uchijin suwimak waitkataik apu aidau nunú muunnak ayatak dii pujugtsuk suwimkan susaagtatui uchijin waitkau asantai.

Art. 186.- Uchijui aidau umimain:

- a) Uchi aidauk niina apaji chichagmak intimjumaitsui, kajegtsuk pegkeg jintinbau asa.
- b) Apaji takataik niishkam yaigtatui unuimak.
- c) Jintintua unuinamu atatui uchijuik.
- d) Uchi takak unuimamain ditanu aidaunak ashi dutikmain, jinta aintu yujauk atsutin.

Art. 187.- Yutai aidau

Yuwa, ichishmamja pujutai tumain aina duka, yutai suwamu, jega nii pujustin, jaanch, papii augbau, jintintua unuinamu, jaakui tsuwamu, wasugkamat aina nui dakujusti tusa juwamu aina nunuwai. Juju aidaunak baki bakichik muun uchigtin aidau diis dutikmain ainawai. Uchi dukujinashkam ejeapjuktata duwi nagkamas kui kuitamkawa emak uchigmakmataishkam kuitamkattawai.

Art. 188.- Uchi atsumamuji sumain

Apu emtin, nuniachkush dita ditak chichasag nuwedauwa nuwiyagkesh uchi akiinawu ataish ya akiae nunú uchinak kui kuitamkawa 18 mijan ejematai idaisattawai. Untsu uchi jamamtinkesh asa, nigki takas pujumainchau ataik muun wajasmataish tuke yaigtatui. Uchi papii wagajuk aujunak niina apajig yaitskek idaisashtatui, tuke yaigka ashi amukmatai idaisattawai.

Art. 189.- Uchijui juki kuitabau

Uchijui juki kuitabauk jujú utugchatnum nunitai atatui:

- a) Idaidaisa batsatbaunum.
- b) Uchigtin jakamtaigkish.

Art. 190.- Idaidaisa pujusa uchi kuitamat

Idaidaisag batsamas dutikmainuk juju ainawai:

- a) Uchi 7 mijan jegachuk niina dukujinig pujustatui.

- b) Uchi 7 mijan ejeyi nagkaemas ajuidauk, apajinigkish, dukujinigkish pujustatakug nii tumamtatui.
- c) Nuwauchik dukujinig pujus 15 mijan ejetatui, nii dukujijaig pujustaj takushkam nunimainai nii nunak tumamtatui.
- d) Uchi aishmagkush, nuwauchikesh asutiamkesh, jiyamkesh waitiagtaik, batsatkamu Jintiinjia nunú uchi patayin egatuk nii kuitamkati tusa susattawai.
- e) Uchi apajigkes, dukujigkesh ukukim uchi batsamas waitiagtaik batsatkamu Jintiinjia nunú diisa uchi patayi ataik nuna susattawai kuitamkati tusa, untsu nunishtaik uchijimatag tusa wakegaun susattawai.

Art. 191.- Uchi bitaikameamtai kuitabau

Uchi apajigkesh nuniachkush dukujigkesh jakamtaig jutiktai atinai:

- a) Uchi apaji jakamtaig uchi aidauk niina dukujijai batsamsattawai.
- b) Uchi dukuji jakamtaig uchinash wajuk kuitamnuk aajabi dukugtuchu jugakmataish dutiksaik tsakapatai atatui.

Art. 192.- Uchi ijagsatin

Juju chicham umikbau códigonum uchi wainkatasa jegajua diyamuk, uchi dukujin, apajinakesh dekas anentuapi tusa shiig aneas pujusti tusa jegajua tuke wainmainai. Uchijin wainkatatus weakug initaik wajuk dutikajaku ainawa nuna dutikattawai, dutikas emak juju códigonum wajintu chicham jintiamuita nuna umiktatui:

- a) Uchi apajigkesh, dukujigkesh nunú batsatkamunmak pujutaik uchi aidauk jegajuawag wainmain ainawai.
- b) Uchi piipich nigki wekaemainchau ataik niina patayi sutai atatui dukujin wainkati tusa, nuniachkush apajin wainkati tusa.
- c) Uchi apaji, dukujigkesh tikich batsatkamunum pujutaik, pamuk jintiau atatui wajuk uchish wintai atatus nuna.

Art. 193.- Uchi bitaikamea apajish, dukujish atsugbau wega nunú

Uchi apaji, dukujijai jakamtaig uchik tikima bitaik jugau asa nigki jugawai. Nunikmataig niina patayi aidau Jintiinjai ijunag patá uchin kuitamaina nuna etegkawaagtatui, uchi bitaik aina nuna kuitamkati tusa.

Nuwiya apu aidau diyaku aagtatui wainak uchi aidau waitkasainum, dekas shiig kuitamkam batsamas aentsmagatnume tau asa.

TITULO VI NUWIYA AENTS AIDAU PUJUTI

CAPITULO I DEKASKEAPI TUMAIN NUNIAKU IWAINAMU

Art. 194.- Juna taku tawai

Dekaskechu aig tsanumku dekaskea imatika takamu aina nuna tawai.

Art. 195.- Dekaskechu aig dekaskea imatika iwainamu

Dekaskechu aig, tsanumak dekaskea imatikas iwainmama duka megkaewai tsanumag jukimujiya nunú ejetamak.

Art. 196.- Tsanujam suma duka utugchat apuschatin

Bakichik aentskesh tsanujam suma duka utugchat apugtam achattawai.

Art. 197.- Dewamu (duwamu, dewat, duwat)

Dewaka chicham umikbauwa duka esakautai atatui.

Art. 198.- Wainka akikmamainchau

Chicham dewaka umikbauwa nunú esakagbaunmag akinikmi jujú chicham besegbaunum tuchatai atatui.

Art. 199.- Tsanumku dekaskeapi tumain chichaka chicham najanbau

Makichik waji pachisaikish dekaskechu aig dekaskea imanun tikich chichakui dekaskeapi tusa chicham umiku akuish esakagbau atatui, wagki, yaunchuk nunin dekaik nunimainchau aig dekachu asa nunikbau asamtai.

Art. 200.- Awanmaka uwaka jujuki wagagbau

Uwakkagtukmatai ii dakitamu aig chicham umikbauwa dutik iwainamua duka esakautai atatui, diyamash pegkegnum jugamain asau akuish.

Art. 201.- Takat pegkejai tumainchau

1. Chicham umiamunum tikichia nunú ayu duke ati tichamtaig duka uminkashtin wainak juaktatui.
2. Uchi tsakatjai, nuniachkush aents jamamtinjaigkish chichaman umikagmataig bakichkish wechatin wainak juaktatui.
3. Aents nampekujai chicham umikbaushkam wainak jugaktatui.
4. Pegkegchau uumka takastasa chicham apamush nunú inakmasa takatai achattawai.
5. Tsanumja dekaskea nunin iwainaktag tibaush wainak jugaktatui.
6. Juju código chichaak, juninuk takashtai ati tibauwa dusha antugbau atatui.

Art. 202.- Dutikami tibau esakamu

Takat nunimainchau aig nunikbau aina duka wainak jugaktatui, nunin aina duka ayamak pachisa chicham umikbau aina nuwishkam pegkejai tamak achattawai.

TITULO VII BATSATKAMUNUM PUJUSA UYUMAMAIN

CAPITULO I UYUMASA WAJI SUDAITAI AMAIN

Art. 203.- Anenjauch amastajame tusa anagkuamu

Bakichik aentskesh juna wajinak anenjauch amastajai tiyatak umiachkush nii wainak anagkagtuau akush suwimkanak jukishtatui.

Art. 204.- Kajitdaisa emtika akiniamu

Bakichik wajinakesh sujuktatajai takui kajintsa emtika akikmakbauk, wainkag megkaemait sui, suwachmak, batsatkamu Pamukjin

chichaman egketuattawai, dutikantai nii Pamuk chichamjuktatui wamak nuna umikti tusa.

Art. 205.- Emtika suwamu waji shiig anentaiyai

Waji yadaukita nunú susa ukuktag takuik nudauwapita tusa shiig mamikjamu atatui. Duka wajiík besejai tusa kuitamsa sutai atatui yadaukita nunú.

Art. 206.- Wajigkita duka uyumaka sutai atin

Nunú wajin amastagme tusa anagkuayatkuik, yapajia juju dekas jukita tusaik waitkaschatin, nunú waji ima pegkeg akikesh nuna nagkaesau ataishkam.

Art. 207.- Waji emesja suwakuik akikú atin.

Bakichik aents, wajiín akikmak ikamkagkesh, dutikachkush anenjanum tsagkatkam taka duka nuna wajiín awakeak besegchaun awagkittawai, tuja wajiín emeseg awagkeakug akikmaku atatui.

Art. 208.- Waji imatiksaik betek sudaibau

Wajiish wajukukita duka imatiksaik ashi susatin yadaukita nunú.

Art. 209.- Jegakesh sujuktaj tajin kuashat aents sumaktaj tau kaunkui.

Jeganakesh, nugkanakesh sujuktag tabaunum, kuashat aents sumaktaj tiagtaik, nejenna duka susau atatui yaki nugka sumamunum papii najatjuata tusa pamukun segae nuna.

Art. 210.- Kuashat aents wajiin sumaktaj tiagtai

Makichik sujuktag tauk, kuashat aents sumaktaj tiagtaik nii diis susattawai, tujash yana dekas emtika Pamukun nunú wajiinak niina susatjai tusa papiin segauwaita nuna susattawai.

Wajií kakajus umuchmain aina nunú sujuktag tabaunum, kuashat aents sumaktaj tiagtaik, nejenna duka susau atatui yaki wajií sumamunum papii najatjuata tusa pamukun segae nuna.

Art. 211.- Waji megkaebau

Wajiík juniak megkaemainai:

1. Wajií ujumak besejukesh, nuniachkush, ashi beseju asa takamainchau wajasmatai.
2. Makichkish dekachbau ayatak megkaekamtai.
3. Wajig ainta nú depetkagtuk nagkaemamunum wajii beseg takaschamin wajasa nunú.
4. Wajii muuntush wegak takaschamin wega nunú.

Art. 212.- Wajii sudaisatag tabaunum umiktin

Waji sudaisatag tabaunum umiktinuk juní atatui:

1. Bakichik wajii ya sukagtustatua nuna uwejen asa besemainai, nuniachkush, nina uwejen asa megkaemainai, nunitaik akiktatui ya susatag tibaukita nuna wajii akekega nuna diis betek.
2. Waji sukagtustag tibauwa nunú kunumdagamtaig dusha wajupa akik amainuk nunike nuna diis wajii sukagta duka kuishkin awagtuktatui ya susatag tibauwaita nuna, megkaekamua nuna apugtak.
3. Puyatjusa kuitamaitak pachiachbau uujut asamunmakesh, nugka tajaebaunmakesh sukagta nuna uwejen abaunum wajii megkaga duka awagkita tusaik utugchat apugtubaitsui, duka nui abuewai.
4. Wajii pegkejapi tusa sumakbau besejú jiinkimtaig, wajin sumakua nunú wajii sujukun kuichkin akikuitkug, emtikagkesh susau akug segattawai kuichik awagtukita tusa.
5. Kuichik awagtugkita tusa tibau tsawan mamikiamu nagkaemakmataig, ekeka akigkata tusa wajupakita nuna segattawai.
6. Wajii susamu ayatak niina uwejen emegkakug tuké akiktatui yana diwimua nuna.
7. Wajii sudaisatag tibauwa nunú suja dusha, suma dusha pachikcham asamunum megkaekamtaig, waji sujukua duka agkan jugawai.
8. Dita dekachbaunum wajii muuntush wajasmataig, wajiin jukitjai tiuwa duka nuninnakesh nii jukittawai.
9. Wajii sudaisatag tibauwa nunú suja dusha, suma dusha pachikcham asamunum besegmataig, waji sujukua nudau jugawai besekua duka.

Art. 213.- Kasamka jukimu asantai akikmamain.

Waji kasamkamua nuna yaki kasamkauwaita nunú tuke aneas wajii emegkashbau aig megkaetukmash tuke akimaktatui kasamkamu asantai.

Art. 214.- Nigki anagmamu

Ya wajii niina uwejen abaunum megkaekattawa, nuniachkush, besegtatua duka nigki bakutai atatui, untsu niish ayamjumamainjin iwainakug agkan jugaktatui.

**CAPITULO II
UMIKTATJAI TAKU DUTIKATIN**

Art. 215.- Dutikatin chichasbau betek umiktin

Ame nunú dutikata tusa tibauk nuna tsawantan uwaetsuk umiktatui. Nuna wi dutiktajai tawa nunú diis wamak umimainchau dekapeakug wajiigtinjai chichas tsawantan ekes segamtatui.

Art. 216.- Tikich inaja takat ematin

Ame nunú umikta tibau, nii dutikmainchau dekapeakug tikichin takata susattawai nii dutikati tusa, untsu nunú ditikachmi tibau ataik nigki umiktatui.

Art. 217.- Inamjamu umigcham dutikmain

Inama duka juna dutikmainai umigchamak:

1. Chichasbauwa duka imatiksamek waamak umikta tusa imatjittawai.
2. Tikich inajam waamak umikta tusa titatui.
3. Emtika akikmaku akug awagtugkita titatui.
4. Takatan tsupimain.

Art. 218.- Inama nunú takat uminchamunum dutikmaina nú

Inama duka takat uminchataik juna dutikmainai:

1. Takat inamjamua nunú betek uminchataik wajupa dutikawaje ima nunak susattawai.
2. Takat inamjamua nunú kuwaka emamunum diyam shiig uminak wechataik takat umikchamujai betek jugaktatui.

3. Puyatjus umiktatayatak tsawan pegkegchaukesh asamtai, diipas ema emakua ashimkamtaig, takatat uminkae tama atatui.
4. Takat shiig uminkashmataig takata jukiuwa nuna, inamjauwa nunu chichak, tsaikta tusa titatui, nuniachkush, inajbauwa nuna daajin tsaiktatui tikima shiig pegkegchau takat jiinkimtaig.
5. Shiig betek uminchataik takatan sukagtusua duka inagbauwa nuna akigkata tusa segattawai tu takat aidauwa uminkache nuna dekapa diis.

Art. 219.- Takat yupichu umimainchau takata sukagta nuna utugchatjin

Takata inama nunú umiachbaunum takat wechataik agkan jugawai inajbauwa duka.

Art. 220.- Inama dusha, inam awa dusha diisagmash yupichu umimainchau takat utugchat au asamtai

Inama dusha, inam awa dusha diismash utugchat au asamtai takat kakajus wemainchau wainbau ataik, inam umiktajai tiuwa duka agkan jugaktatui. Untsu ayatak eemtika susamua nunak awagkittawai.

CAPITULO III

TSAGKATDAIKAMU UYUMAKA BETEK AKINIAMU

Art. 221.- Tsagkatdaiyat

Tsagkatdaibau aina duka, juju códigonmak, kuichkin tsagkatkagtak iman tsawan asam akikmakta tusa tsawantan mamiktua sukagta nunuwai.

Art. 222.- Tsagkatkagtaun ayamke

Kuichki tsagkatkagtinuk ya kuichkin segamne nuna wajupa tsawan asa akikmakti tibauwaita nuna dutiksag wamak awagkita tusa segattawai. Nuna umishtaik batsatkamu Jintinjin chichama egketua akikmitkaktatui.

Art. 223.- tsagkatdaikamu akiniamu

Tsagkatdaikamu ataik batsatkamu Pamukji chichamjuk awagkittawai, kuichkinakesh, wajinakesh, kuichki tsagkamkau tuchataish kuichki tsagkatkagtuku wajintatua dutiksag awagtuktatui. Uwagak akikmamain ataik iman akikmakti tusa umika akikmitkaktatui.

Art. 224.- Kuichik tsagkatkamu nú umiktin

Kuichki tsagkamkauk Pamuk umiak wajupa tsawan asa awagkita titatua dutiksag awagkittawai. Diwimkagtuku kuichik atsugmak takasagkesh akikmaktatui kuichki tsagkatkagtuku wajintatua dutiksag.

CAPITULO IV

AKIKMAKTIN MAMIKIAMU BETEK UMIAMU

Art. 225.- Akikmamu

Akikmamua duka kuichik wajupa sukagtusbauwaita nunú imatiksaik awakeamua nuna tawai.

Art. 226.- Yapajia akikmachbau

Kuichik tsagkamkamua duka awakeajai tusa sutamak kuichkin amastajai dutikakun wajii aina nujai amakun diwin umiktajai tutai achattawai, atus chicham umikchamu aigkik.

Art. 227.- Tikich aents akikmamu

Tikich aents niina daajin wajii jukichu akush dutikami tibau ataik nuna umiak nii akikmatkatjai takug akikmamainai waji jukiwa nuna daajin, untsu dutikachmi tibau ataik dutikmaitsui.

Art. 228.- Wajuk iwainaka akikmatai atatua

Aents muun papiigtin aina nunú diwi akikmakbauwaitkug duka pegkejai. Tuja diwimkagtukua nuna daajin akikma dushakam pegkejai, atus akatja papii susa akupkamu akug.

Art. 229.- Akikmakbauwa nunú dekaskeashit tusa iwainamu

Wi akikmakmajai tawa duka niyai iyawai dekas takumek wajuk akikmakbaume nunú iwainakia tama iwainaktata nunak. Diwimkagtukushkam niina susauwa nunú dekas jukijai tusa papiinakesh suwachmak eke akitsuk emetjuattawai, nuna juak akiktin asa. Tuja papiigtuchunakesh tikich wainainai akikmaku agkug duka waitchauwai tikich wainbaunum akikmaku asa.

Art. 230.- Iman akikmakta kuichik tibau betek akikmamu

Dita nugkenia kuichik takatai aina nuna akiken diwimkagtuku akug nunú kuichkinak akikmakttatui tikich nugkanmaya kuichkinak akikmamait sui, tuja uwaekagkesh akikmamait sui wajupa akikmaktin yama nagkamchaku chichasmawaita nuna dutiksag akikmatatui. Untsu akikmatsuk kuashta tsawan wetaik kuichkin susauwa nunú diis wajupa kuichik eemainnak megkaeka nujai ijumag segattawai iman akikmakta tusa.

Art. 231.- Kuichik sudaisamu akiniamu

Kuichkin diwimkagtukuk wajupa tsawan asa awagtugkita tibauwaita nuna dutiksag awagkittawai.

Art. 232.- Atsumaku kuichik tsagkatdaikamu akike ekesa akiniamu

Kuichki segamiuk wajupa tsawan asan akikmaktajai tiuwaita nuna uwaetsuk akikmakug ekeka akikmakta tamak achattawai.

Art. 233.- Tajimtameatnujun takastajai tusa kuichik ikamkamu ekeka akikmamu

Kuichik sukagtau kuichki segamujai shiig chichasu amainai wajupa uwaekash akikmaktatua nuna pachis. Niina diwin juu tamawaik akikmaktajai takug dutikattawai, dutikachkush wajupa nantui akikmaktajai tiu akug nunashkam dutiksag akikmaktatui.

Art. 234.- Epegtujuati tusa chichama epegkin aidaunum egkeamu

Kuichkin sukagtusua duka akiashmak chichaman egketuau atatui batsatkamu pamukjin akigkati diwimkagta nuna tusa.

CAPITULO V UYUMAKA AWAKTUNIAMU

Art. 235.- Awaktuniamu tawa dusha wajina pachis tawa

Betek akikmakchamukesh akui, kuichkikesh, wajigkesh suwamu maak anentaimas jugakti tusa.

Art. 236.- Kuichik mai betek diwimdaikamunum jutik awagtunitai atin

Kuichik mai diwimdaikamunmag jutik awagtunitai atatu:

- a) Kuichik wajupak sudaisamuita nunisaik betek diwimdaika wajasbaunmag, jujú ii diwimdayag duka dekas amesh awagtugkipa, wisha awagtukchatjame tusa nagkantai atatu.
- b) Tuja mai diwimdaikamunum kuishkin suma nunú ima senchi diwimkagtau akug awagtuktatui diwibaujin wajupa wagak diwimkagtawa nunak.

Art. 237.- Betek diwimdaikau achakuish jutik awagtunimain

Jutika awagtunitaishkam atinai:

- a) Diwimdaikaju aidau kuichik atsugmak chichasag niinu waji ataik nuna akiiken diis nujai dita diwijinak akikmak idaisaagtatui.
- b) Untsu tikichia nuna wajijin akike nii diwimkagtukbaujai betek achataik mai chichasag kuichkinakesh, dutikachkush tikich wajinakesh akikmaktatui.
- c) Untsu kuichik akikmamain shiig atsugmak mai chichasag takatnakesh takagdayinak akinimain ainawai.

Art. 238.- Waji ayamjumasa pujutai aina nujaig akinimainchau

Mai chichasa diwimdaikamuk waji atsumaku ayamjumasa pujutai aina nuninjaig akinimaitsui

**CAPITULO VI
UYUMATKA AWAGKI APUGTAMU**

Art. 239.- Juna jintiak tawai

Junak waji megkaekamtaigkish tikich waji pegkeg nuninuk awagkeamua nuna jintiak tawai. Tibau akush asati, yaunchuk aya nunisag ati tabau.

Art. 240.- Besegmatai awagtamu yamajam

Tuke aneasagkesh, nuniachkush nuna dutikatjai tachayatak makichik wajinakesh tsuwapaa emestanakesh emesjau akug iwajug yaunchuk aajakujai betek awagkittawai, dutika iwajam pegkeg amain ataik. Untsu iwagmainchau ataik tikichin sumak nuninnak awagkittawai.

Art. 241.- Ataksa akupkamu waji megkaekamtai

Waji ataksa akupkam jintaa wesagkesh utugchatkesh atsaig nii puyatjutsuk idaisam megkaekamtaig waji ataksamua nunú tikichin sumak awagkittawai.

Art. 242.- Agkan idaibau

Waji susa akupkamu jintaa weamunum utugchatkesh atai tuke aneas emegkakchau akug niinu utugchatak atsugtatai. Nuna awagkitasagkesh wekaetuschattawai.

Art. 243.- Ataktu awagki awaibau

Takak pujaunakesh dekas yapajinati tusa tikichjai yapajiamak, takatnum jiikbau aidau ayamke umikbauwa nuna chichamjumak ataktu nii takajakbaujin wakitki waimainai.

**CAPITULO VII
PUYATJUKA AWAGKEAMU**

Art. 244.- Juna jintiak tawai

Junak makichik wajigkesh tsagkatdaikamu kuichik akinitsuk awagtunitai aina nuna jintiak tawai.

Art. 245.- Wajupa tsawan asa awakmainaita

Waji tsagkatdaikamuk yana wajijigkita duka dutiksaik tsawan mamikiamuk nunú tsawantinig awagtunitai atatui.

Art. 246.- Waji tsagkatdaikamu megkaekamtai

Waji tsagkatdaikamu megkaekamtaig yana tsagkatkae nunú yamagman awagtuktatui wajigtinun.

Art. 247.- Waji tsagkatjukbau aiksaik emetua juwamu

Waji tsagkatkam awagtsuk uuka jukimtaig, wajigtin tsagkamkauwa nunú batsatkamu Jintiinjín chichama egketua awagtugkita tusa segattawai.

CAPITULO VIII

UTUCHATNUMKESH, EMESJAMUNMAKESH AKINIAMU

Art. 248.- Juna jintiak tawai

Wajikesh emesjamunum, kakajuts awaktunimainchau, iwagtakesh iwagmainchau ayatak kuichik akininati atinun pachis juju códigonum umiaku jintiamua nuna tawai.

Art. 249.- Takat umikchamunum dutikmain

Takatan achika takak, dekachu asagkesh, nuniachkush dekayatkugkesh shiig takatsuk tudatu takasbaunum, takata achikua nunú takatjinnun akiktatui iwagmainchau emesjau asa.

Art. 250.- Takasa emamunmaya emeseaku

Waji emestujagmatai megkaebauwa nuna jintiak tawai jujú codigonum. Yaki emeseawa duka akiktatui emestugbauwa nuna.

Art. 251.- Jumain tsawan megkaebau

Inatjamtai takasbauwa nunú akijatkachagmatai kuichik jumain megkaebauwa nuna jintiak tawai. Yaki akiktajame tiu ayatak betek umiatsua duka wajupa tsawan takasta tukagtiukita imatiksag akikmaktatui.

Art. 252.- Pujusnush juna takakun umijmamkau atajai tibau

Aents takak emkatatus nagkama juki emaun tikich aents jinta tsupijuk emestauk, wajig ainta nunitaish nii takak wajupa eemainna emegkake nuna akiktatui.

Art. 253.- Batsatkamu takatji emaku aents waitkamua nuna ayamke

Batsatkamu takatji emaku, nuwiya aidaujai utugchat aepjuniamunmak jutik iwagtai atatui:

- a) Achu, weantu aidaukesh, mamakesh, paampakesh, tikish ajak aidau ayatak yuwa ajaptai aina nunú aitaik, batsatkamu chichak ashi nuna yuwa amukti tusa tsawantan mamiktuattawai ajagtina nuna.
- b) Ajak yama ajakbau ataik, nuniachkush yaunchuk ajakbau ijuna nunú ajapeamu ataik, ajagtina duka akiam atatui.
- c) Jegakesh, nuniachkush, yujag aidaukesh, ajak jigkayi sujaku kuichik jutai, (café, cacao, numi, etc.) aidaunak batsatkamu nuna akiken diijus ajakjinnun akiktatui.
- d) Aents puja nunú nugke achigkuik tikish nugka diigsa yaunchuk nugke pujusbauwa imanuk sutai atatui.

CAPITULO IX MUUNTI UYUMAKA DUTIKMAIN

Art. 254.- Ishinka yujatai aina nunú anuntut

Ishinka carreteranum wekaetai aina nunú awajuni nugkeen utsanaidauk ashi papiigtin aagtatui, anunta dusha papii susamu, tukujatmatai akikmamaina dusha papii umigkamu utsaanin aagtatui. Ishinka namaka yujatai aidauk ashi ya nuna diin ainawa nunú papii susamu aagtatui. Ishinka namaka yujatai batsatkamunmaya aidaushkam papiigtin aagtatui. Nunú papiinak baki bakichik batsatkamu yana motorjimpaita, motora númeroji najanku agatjamun, motora daaji ashi umigkamu atatui, tuja aents anunta nunashkam jujuwai anuntut tusa Pamuk papiin najatua susamu atatui.

Art. 255.- Wajupa mijan ajamu anunmain ainawa peque pequenash

Peque pequenak 8 mijan ajamu nagkamas anuntai atin. Untsu tikijuchik wegakug tikich anunmain atsutaik 15 mijanji ajamush anunmainai. Tuja makichik muunkesh niina uchijin, nuniachkush tikich uchinakesh 15 mijankesh jegachunak anunkata tusa inakug nii nunak bakumattawai.

Art. 256.- Uchi tsakatuch egkeja juamu

Egkemja carreteranum, namaknumkesh wekaetai aidaun anuntuidauk, uchi apaji dekatsaigkik, nuniachkush uchi yana jeen pujawa nunú dekatsaigkik egkejag jumaitsui.

Art. 257.- Batsatkamunmaya papii aujus ashimkau aidau

Ashi aents batsatkamunmaya papii aujus ashimkau aidauk, amek dekas neje tautiume tusa papii umigka susamun, tuja nuigtushkam unuimaju aidaunmashkam ijutkajai tusa papii umikbaun juki batsatkamu Pamukjin susattawai. Untsu wainak tsanumkugkesh wisha papiin amukuitjai taun dekajuawajag suwimka juwak batsatkamunum achinak emkemattawai.

TITULO VIII IJUNJA BATSAMSA DUTIKATIN

CAPITULO I INANIT

Art. 258.- Juna jintiak tawai

Jujú codigonum tabauwa duka, bakichik aentsjainkesh, jimag aentsjainkesh, nuniachkush kuashat aentsjainkish takat umigtukta tusa inanita nunuwai.

Art. 259.- Wajuk niimtina ainawa inanitash

Ayatak chichasaikish, nuniachkuish, agajaikish umikbaunum inanita atatui:

- a) Ayatak chichamaik jintia inanita atatui, wajuk ijuntsa antugdaisa pataa aidauti takasa batsamta ainawa nunú takatnum inanigtag tabaunum. Dutika takamuk jimag aentskesh antamunum umimain amainai duka dekaske tusa titina nunú utugchat akuish pamuku eemtin.
- b) Takat inanigtin chichasbaushkam dita dutikami tuinakug papiinum agagbau atatui.

Art. 260.- Agkan inanit

Wajuk inaniamuk ati duka agkan umiamu atatui, tujash, inaniakuish, wainka chicham uwaeja nunimainchau takatai achattawai.

Art. 261.- Inaniamu uwaetsuk umiamu

Takat inanigbauk imatiksag betek umiktinai. Yaki tu chichaka inanigtin najanachmagjama tawa duka iwainak juwi tajai tusa etsegkattawai.

Art. 262.- Shiig anentaiyai takamu

Takat inanigtin umiamuk bakichik anentaiyai tsanunitsuk chichasbau atatui.

**CAPITULO II
AKIKMATKATIN**

Art. 263.- Wajimpaita akikmatkagtina dusha

Junak tikich aentskesh diwimkagtutai, wi akikmatkatajai nii akikmashkuish tawa nunú aents.

Art. 264.- Akikmatkagtinush tuna umiktatua

Aents diwimkagtuk akikmashtaik, niina chichamjuku akikmatkattawai, dutika nii nuna aentsun segattawai ame akikmatkabiajam nunu awagtugkita tusa.

Art. 265.- Wajuk dekaiya akikmaktatuapi tumainaita

Kuichik 500 soles nagkagas jiyamua duka papii najatuamu atatui. Untsu kuichik nuni piipich jiyamu ataik ayatak jimag aents antuinai dekas akikmaktatui tusa umikbau atatui.

**CAPITULO III
ANENTAG SUWAMU**

Art. 266.- Anentag suwamu

Anentag sudaibauk, makichik aents wajiigtin tikich aentsun anenjauch niina wajijin suwa nunuwai.

Art. 267.- Wajuk diijau ainawa anejauch sudaitai aina dusha

Anenjauch sudaitak ayatak chichamaik chichasa sudaitaish ainawai, unstu papii agaja umika sudaitashkam ainawai.

- a) Waji initikish anenkanum sudaikuish wajuk atakdaitaik ayi, nunú waji aina nú sudaikuik ayatak wenuik chichasa sudaitai atatui.
- b) Waji yaimin aina nunú anentag akupkamukesh waya nunuwai juna anenka juwajai tusa papii najatam atinuk, aantsag, batsatkamu wajijji anenkanum sukagtamua dushakam jutik anenka sukagtajai tusa papii najatuamu atatui.
- c) Wajig anentag ainta nunú sudaibaunum dekas jusha papii najatuamu atí tabau ataik, dushakam aiksaik papii najatuamunum sudaisau amaina.

Art. 268.- Wajupa anentag sudataish atin

Wajiin anentag sukagtauik niinu wajijji wajupa awa nuna nagkaesauk, nuigtush, nii ayamjumsa pujutaiji aina nujai sukagtumait sui, nuna imatikamtaig wajiin ashi sukagtusu waitmain asagmatai, idaimitkamainai. Tsawan anentag sukagtusbauwa nunú bakichik mijan nagkaemakmataig awake anentaimja waji awakjatjai tabauk atsuttawai.

Art. 269.- Anentag sudaimainchau

Yabai jujú código jiinki nui nagkamsag batsatkamu nugkeg Estadokesh, nuniachkush tikich institución aina dukesh anentag nugka sutak atsuttawai, ayatak tsagkattai atatui wajina apujus yaimkatag tusa atsumawa nuna dutikati tusa 100 mijan, aantsag tsawan eketkamu amainai yaimá pujumaina nunú eke abuechakuig.

CAPITULO IV TSAGKÚJA TUKE SUWAMU

Art. 270.- Juna jintiak tawai

Tsagkujamu tawa nunak juju códigonum makichik aents wajinakesh tikichin tsagkatkamujin akigkaipa tusa anenkanum idaita nuna taku tawai.

Art. 271.- Diwimdaikamu aig idaibau

Diwimkagtuku akikmakti tibau aig, nii susauwa nunú chichaak, akigkashti asati idaisatjai anenkanum tutai agkan idaibau.

Art. 272.- Tsagkuja diwi idaitusbaush wajuk iwainatai atatua

Jujuwai tsagkujamu iwainamu:

- a) Diwijinak tsagkujamui tusa batsatkamunmaya pamuk papii najatua susamu.
- b) Tsagkugbaun wainkau aidau duka dekaske tusa tiagtin aidau.
- c) Diwijinak tsagkujajai akikmakchattawai tusa chichakui egkekbau amain.
- d) Aents ijunjamunum diwijinak tsagkujaji tiu ataik dekaske duka tusa, ijunja ashimku papii agatainun (acta) agagbau amain.

Art. 273.- Chichamkagtuku agkan juamu

Diwimkagtutai chichamjukuk diwimkamu chichaak diwinak akikmakchattawai timataig niishkam agkan juaktatui.

**CAPITULO V
TSAGKATDAIKA AKINIAMU**

Art. 274.- Juna jintiak tawai

Tsagkatjukta akiktajame tamak, nuna dutikakush wajupak akikmakti nuna mamiktua susattawai iman tsawan takasam akigkata tusa.

Art. 275.- Akikmakta tusaikish tsagkamainchau

Ya tsagkatkatjame akigkamnum tusash tumainchau ainawa:

- a) Tikichi wajijjin kuitamjin aina nunú niinuwa dutika tsagkamainchau.
- b) Uchi 18 mijan ajachbau aina nunú.
- c) Apu aidauk, niina atuwe aidaushkam wajiin dita takaina nuwiyanak akigkata tusagkesh tsagkatkagtumainchau ainawai wajii ditanuchu asamtai.
- d) Batsatkamu nugkeshkam akikmakta tusa tsagkamainchau.
- e) Awajuni daajin yaimaunum jukimu aina nunú tsagkamainchau.

Art. 276.- Wajii akigkata tusa yupichu tsagkatdaimain aidau

Akikgkata tusa wajii yupichu tsagkatdaimain aidauk juju ainawai:

- a) Batsatkamu wajijichu makichik aentsdau aina nunú ainawai akikgkata tusa yupichu tsagkatdaimain aidau.
- b) Batsatkamu wajiji ekemtai wegantu aidaukesh
- c) Jega batsatkamu ijuntaishkam
- d) Jega aidau

Art. 277.- Wajupa tsawan sumainaita

- a) Jega batsatkamu ijuntaig tsagkamainai atus ijunja chicham umikbaunum.
- b) Ekemtai, mesa, papii chimpia takatai aidaukesh batsatkamunu aina duka ijunja chichasbaunum tsagkatkagtutai atatui.
- c) Makichik aentsu wajijigkesh, niina patayi wajijigkesh, tsagkatdaiku akiniamuk wajigtin wajupa tsawantan mamikiattawa nuna umiktatui waji juwa nunú.

Art. 278.- Waji akiniaku tsagkatdaikamu awagkeamu

Tuwi auk wajish tsagkamkamu ainawa nuig awagki sukagtutai atatui, untsu aatus chicham umikchamuitkuig, tuwi sudaisamu ati tabauwaita nunui atatui.

Art. 279.- Waji tsagkatkagta dusha tuna uyumaktatua

Wajin tsagkatkagta duka betek wajin sukagtin atatui tuwi atatua, wajuti atatua imatiksag.

Art. 280.- Wajii tsagkatam akikma nunú.

Waji tsagkatkam akikmau aina duka:

- a) Wajupa akikmaktatua nuna uwaetsuk, tsawannashkam uweatsuk akikmaktatui.
- b) Wajii tsagkatkamunak puyatjus kuitamkatin
- c) Itugkatatus tsagkamkae nuna dutiksag takastin
- d) Wajin tsagkatkamun emtika ujaku asa, niina wajijin pegkejashit tusa diimainai.
- e) Waji besemainun wainkug nii dutikmainun iwajattawai.
- f) Tikich wajijaigkish yapajiashtin, niimenakesh yapagtuashtin
- g) Wajupa tsawan takastajai tusa segamne nuna dutiksag awagkitin
- h) Nuigtu dita chchasbau ataik nunashkam betek umiktin.

Art. 281.- Dakama pujutsuk wamak iwagbau

Wajjin akikmak tsagkamkauk wajii besetaik, wajigtinjai wamak chichamainchau ataik nigki iwajattawai duwi wajigtin awagtugkiti tusa.